



梅山集  
三十一

墓誌銘

廿二

~16  
2373  
22



門 第 18  
號 2873  
卷 28-22



梅山先生文集卷之四十一



墓誌銘

敦寧府都正 贈吏曹叅判趙公墓誌銘 并序

孟子云人有所不為而後可以有為知所擇而能有

所不為者歷選近古其惟觀我齊趙公乎 英廟乙

卯重募 世祖御容儀曹以公素解畫法用 上命

召公公時在宐寧任所不膺 命曰如此者與畫師

何異非其招不往古道也竟對吏抵告身之律戊辰

又重募 肅廟御真 上舉公名諸臣差公郎官

上怒前事特遞只令入叅監董公即出膺 命曰監

董而止何嫌焉筵臣請屬公執筆公注目視其人  
上笑曰是熟視卿矣仍問汝能執筆乎 辭教委曲  
公自念今日事與乙卯無異矢死力辭曰人臣之義  
見危授命則有之苟可以報効雖湯火亦無所辭至  
若執技事上聖人著之禮經俾不與士齒臣雖微賤  
詎可自同衆史汗辱衣冠乎且 國家置圖畫署政  
爲此地人臣事君各有其方臣有死已矣不敢聞  
命辭氣激烈犯 顏無所撓 上色變又教曰汝不  
知予意攸在左右相繼詆斥 上揮手止之曰予方  
得人之歡盡於大事其勿復言 命勿令外人知卒

又 譴責不已是日觀公之爲者莫不愕然相顧素  
不悅公者退語人曰察其所爲儘識事君之體大非  
容易人 上每語及公輒褒以介潔注擬間見公名  
必 批下蓋公奏對明剴動悟 宸聽始加威怒終  
獲見諒豈苟然哉陶庵李文正公嘗贊歎曰有是哉  
某之爲人豈流俗可及公始拜祠官以木根結理金  
吾議律勘以決杖而不受贖諸寢郎或幸於保祿而  
公引峻文自當曰 國家徵贖將以長廉遠恥法意  
甚美待士夫不薄盡衣冠異章服古人猶恥之况露  
肌膚受辱乎乙卯則衆口噂沓曲成義理降志苟免

宜若可爲而公處困益亨期於自遂及在囚而議讞也胡赦不日將至人或以姑息愛公公慨然曰士大夫安用胡赦爲趣諸堂勸律自請行遣若是者豈非所云有所不爲者哉公諱榮祐字宗甫咸安人以新羅元尹鼎爲初祖入本朝有諱旅值莊光之世與梅月諸賢同志同傳有諱舜吏曹參判爲戊午名賢有諱堪主簿以學行贈執義爲栗谷牛溪兩先生所傾服是爲公高祖也曾祖諱鎰平市署令贈吏曹參判富昏朝金墉之變抗疏正仁弘罪祖諱逢源同知中樞贈吏曹參判師清陰金文正公爲

尤齋宋文正公所薦引惠訓後生農淵諸賢皆出其門考諱楷淳昌郡守贈吏曹參判服事尤齋如子姪妣晉州姜氏叅奉游其考也公生稟絕倫心目所到學無不能稍長游學無方未弱冠聲譽已滿口癸巳進士戊戌筮仕爲章陵叅奉遷司饗院奉事尙瑞院恭陵直長掌苑署別提司憲府監察濟用監司僕寺典牲署主簿義禁府都事戶曹佐郎刑曹正郎宗廟令司饗院司藁寺僉正廣興倉守外而爲燕岐堤川積城左寧安陰縣監白川郡守丙子因仁元聖母壽躋七旬有推恩之典陞通政除僉知

中樞敦寧府都正壬寅伯氏留守公被士禍流竄公亦棄官塞兌若將終身戊申羣兇又舉兵叛公以此時出宰堤川不動聲氣而措置得宜一境賴安自乙卯見忤朝廷十數年放廢艱食人所難堪而公則自得也白川時新令嚴急列郡爭以漏結自劾公歎曰如此則吾民重困留零殘以紓一方之急公雖以此徒配旋命宥曰斯可以觀過知仁筵教鄭重論者感服公享年七十六而卒于辛巳三月二十七日五月庚子穿夫人墓合窆于坡州遊山良坐因季胤推恩贈公嘉善大夫吏曹叅判兼銜如例配贈

貞夫人延安李氏縣監贈判書賀朝女文貞公端相其祖也闔範咸備舉三男重希重睨以孝旌閭俱歿重瞻同中樞三女適洪啓能郡守金頰判書李潭重希繼子寬鎮重睨繼子匡鎮同樞男桓鎮匡鎮常鎮女叅判閔耆顯金在璿金觀淳洙澤朴正陽妻桓鎮出及匡鎮出渝常鎮出金在璿繼子命鉉監役洙四男敏植敦植教植敷植澤男圭植女進士俞景煥公性於孝蚤喪怙恃終老含恤覩物必興慕語及輒泣臉廟在異宮而薦享齋素致敬情文俱盡耄及而猶以筋力爲禮殫誠鳩財樹顯刻于墓隧哀輯先

世文獻鉅細畢舉又收世父零稿劄劄而行之損菴集是也事姊氏及留守公如父母與伯仲氏比屋團圍有春津之樂教子姪嚴而有法長子早亡晚育如孫而授課振德不少假借俾知科舉外有聖賢事業詔以往哲言行癸亥兄子忠憲公言事事將不測舉家皇皇而公反嘉與不以禍福動心莅邑不求赫譽專撫摩鋤強猾既又修治費序用闡儒化間聚耆耆朋酒讌樂乃問年養老之古義也公餘放情山水尋幽選勝因之採訪民隱及儒先遐躅韻士遺風庶乎風雅之觀焉爲治廉約文以儒術慈詳惻怛曲盡人

情以故遺愛在人訃至南民泣惠不憚重繭人各致賻焉公嘗以生色宦財爲人四大欲夙夜兢慎晚復矢言曰今而後庶幾免夫而志氣益衰弱晚節尤可戒是爲公律已大略而一節終始者也文章書畫世稱三絕安可洲重觀文眼空一世獨引重公若不可及詩學盛唐晚喜陳簡齋有請畫妙者公曰以畫傳畫所以非也卽物寫真乃爲活畫也於詩文深造妙悟因畫而得者爲多云筆法道逸合衆體成一格揮灑如飛颯颯有聲晚愛董玄宰才性近也公貌如孤竹介如堅石雅意林泉不屑榮利雖勉從祿仕而玩

心高明居恒警醒淨掃書室圖書几案秩然有序喜  
植花卉用供幽玩樂意相關如對賓朋撰杖移席酬  
酢罔倦以發冲澹之趣望之如神仙中人公世篤詩  
禮淵源有自祖彌兩代傳習華陽公又從良庵李文  
簡公學以故誦法父師者淪浹充盈其所雅言若飲  
食之在口每自傷辱身吏役輒指心而歎曰我負師  
友多矣專門朱書徇稽衆說周復不已其老而好學  
如此夫子論人之善而必本於父兄師友厚之至也  
其公之謂乎嗚呼吾夫子以未見剛者爲歎人有一  
身而被威怵利疚夷險百塗能全其守者鮮矣如公

者可以臨大節而不可奪豈不誠君子人哉直弼夙  
服公風義雖爲之執鞭而不辭公玄孫敏植謁幽堂  
之誌懦衷倣激未敢固讓竊謂無愧辭如伯喈之於  
郭有道焉銘曰

巴山炳靈古多名賢公又挺生續序象先性剛氣清  
志高行全爲道簡易條理微密存心白直尺度嚴栗  
先立其大卓乎風節不撓不逃萬夫莫奪何以致之  
本之則存江漢羹墻華陽芝村寤寐鑽繹考亭名論  
魯無君子斯焉取斯苟展志業何用不宜明堂棟樑  
太廟尊彝名實純粹爲當世師贊公三絕淺之爲知

有不可傳大化冥茫律律遊岡儼若斧堂一氣孔神  
騰有晶光薦章玄隧矢德于銘允矣標望永垂千齡

存齋魏公墓誌銘

并序○戊申

惟我 正廟乘文明之運任君師之責搜羅巖穴登  
崇俊良有若存齋魏公起自草萊直拜守宰值惠風  
痺罔究功用而遭遇之榮聳動朝野於乎懿哉公諱  
伯珪字子華長興氏以高麗太保繼廷爲初祖簪組  
相承有諱廷烈縣監諱東寔諱世寶號三足堂諱文  
德進士有文行寔公高曾祖禰也妣海州吳氏其考  
日三也闡範咸備進士公夢白龍降庭是日公生生

有異質纔晬僂語教以六甲一聞輒誦三歲知讀書  
方夏屏處習跪坐每鄉儼及娼妓雜戲少長奔波而  
獨若無覩與幼弟遊戲弟匍匐將下堂勢必墜傷卽  
曳絀束棉以下之長者奇之曰四歲兒乃爾可量其  
異日經綸也六歲讀小學乍閱諺解僂曉三聲轉注  
反切之法見隣人子母弟兄相閱者卽書不善非人  
不孝非人子九字於紙佩之八歲讀大學僂解襍躬  
昧爽必盥輒記某日失某言誤某事以自警長老指  
燈命題對日照物不欺暗丹心見本明九歲登天冠  
山作詩云發跡天冠寺梯空上春昊俯觀人間世塵



埃三萬里其志氣超越如此手模夫子像揭壁而拜  
并寫顏曾思孟子紙榜讀書其下作座右銘曰古之  
仁也愛今之仁也巧令古之義也宜今之義也剛戾  
古之禮也敬今之禮也飾僞古之智也知今之智也  
詐譎又云與其視人寧自視與其聽人寧自聽嘗與  
同學者述詩言志皆志於榮達而公獨云讀書學聖  
人立身顯父母若遇風塵世採採烟霞歌紫芝劬經  
研理不得不措碁三百註先後天說纔閱已能領悟  
稍長博涉諸家天文地理律曆卜筮兵韜算數之類  
罔不蒐羅至百工技藝皆目擊心解手造機衡度數

不差而不欲以一藝成名致力於易禮古今禮說及  
易總啓蒙等書常隨身而專治既冠已成巨儒遠近  
聞風至集鄉塾學規壹遵石潭里中飲射亦倣古禮  
邑宰薦公曰才高行美學邃啓蒙時公年纔踰弱冠  
矣辛未贅見于屏溪尹文獻公問答辨論被師門獎  
謔名公室曰存齋乙酉中生員丁亥哭山頹加麻五  
月自是躬耕養親荷蓑帶經且耘且讀述社約善鄉  
俗自任以陶鑄後進每歲四季會昆弟及家衆獻壽  
兩親長幼貴賤咸以序列倣柳仲塗朔望訓讀諺釋  
以聽之議昏者必於公門曰魏氏子豈有可擇是可

驗身教之孚感家庭也 正宗甲寅湖沿海盜遣閣  
臣徐榮輔慰諭徐公素聞公名至是更悉公行治又  
取覽文稿還朝請獎用 上允之更加詢訪乙卯  
特付軍銜 上必欲致之命道臣敦遣仍命上公所  
著寰瀛志時公年六十九病不能赴 召又 命待  
春和并徵所著文丙辰除繕工監副奉事辭不就  
上以宣召不及時罪該曹仍 教曰春寒尚峭不能  
自力而登程乎若是遲滯誠甚訝苑嚴飭道臣俾之  
急速起送丙辰四月強疾膺 命詣 闕上萬言封  
事立志舉賢爲六條之綱兼陳老病乞還鄉 上優

批若曰初一立志明學之奏予庸嘉乃予志不立故  
民志不一正學不明故邪學不熄莫非予反省處第  
二簡弼舉賢之奏予庸嘉乃以人事君大臣之責也  
別蔽拔茅竊有望於今日嚴廊次三次四次五次六  
言言剴切切中時弊爾以遐陬疎蹤能竭論至此未  
聞所以求益也即令廟堂稟覆俾有實効爾年七十  
承 召上來若依願還鄉則所謂去來何所聞見欲  
待計仕則有甚於馮老郎潛畀以一邑得施所蘊仍  
命銓曹擬守令初擬機張 上曰老人何以遠赴本  
道文蔭中相換更擬秦仁 上以稍遠家鄉特除玉

果縣監乘駟赴任 批下士林拭目而疏語譏切矜  
紳於是太學及四學捲堂罷製賴 上調劑而止及  
蒞官首設鄉約除紙役紓僧弊蠲魚供蘇漁戶例貢  
生魚爲邑瘠瘼代納以錢罷官納諸稅及各廳契防  
用寬軍役興學講武平糶減徭修繕公廨不煩民力  
壹是以瘠已肥民爲度丁巳春中風猝斃呈遞不獲  
六月以久病居殿 上曰魏伯珪治績不係於病且  
觀其考題宏褒不宜貶專是軟地插木切責道臣卽  
授掌苑署別提公辭以疾銓曹例請改差又 教曰  
魏伯珪文識姑舍其家行聞極純備豈無抱負而然

朝家之斷斷於伯珪者決不可使徒然落仕本道  
廟殿令中相換卽授慶基殿令不就戊午十月二十  
五日卒距其生丁未爲七十二歲翌年二月五日葬  
于茶山丙坐丙寅配享竹川祠淑人金海金氏始聲  
女克配公德後公七年卒附公墓舉二男一女道立  
道及女適曹光振已下不錄公孝友天德居前後喪  
易戚具備備述考妣言行心貌爲思成錄貯免胎時  
臍帶佩諸囊萬慕終身與四弟三妹垂老湛樂待家  
人仁而嚴閨門之內肅如也推以敦宗族輯鄉黨施  
教村秀隨才成斲而必先其貧窮失學者優於好善

若已有之雖未見其人稱譽不已見人爭鬪譬曉曲  
直俾底解紛常恐一善之埋沒必爲之闡揚最惡流  
俗曰全昧性理之學者雖有出人之智終不得文章  
之妙悟其妙者亦可以自樂窮通寵辱靡足以動其  
心常揭師門所書敬義二字于座右終日儼然不見  
其散容也夙抱經濟之志備述八域山川土地饒瘠  
政弊民俗遠近險夷罔不博考潛究瞭如指掌名之  
曰政弦新譜隨陳矯揀之方著分賑節目爲災年邑  
宰所取法焉嘗抄經傳中格言至論名曰古琴每酒  
醺輒諷誦又有禮說經書條對讀史劄錄詩疏傳記

序說合雜著近百卷雖閒漫識述咸有理趣嘗歎曰  
若有後世子雲亦當朝暮余於千載之下其所自期  
可見也公文章夙就學識淹博少治功令尤長於對  
策四魁東堂每會南省貴遊子弟攬掇不已而閉戶  
不接以故輒落第嘗赴庭試于二所有雅重公者主  
試要就一所公辭曰從座主改就是媒進非素志也  
其嚴於守身者如此 正廟諭筵臣曰魏伯珪以白  
首固窮之士承 命赴召書進所蘊首尾累千言縱  
橫博洽有足嘉尙雖或有一二未厭處亦何害於迂  
儒本色而重臣臺臣相繼攻之有真若妄發者然如

是而何以勸草野之士而徠踈遠之言乎予甚不取  
公肇起南服世莫有先後者而際遇 聖朝恩禮不  
替苟非公望實俱隆有以上格亦何以與此哉湖南  
之學由河西高峯而至于遜齋木山公又殿兩賢而  
作種學績文聲譽傾一路又服事儒賢造就崇深濟  
以經綸才猷蔚有範圍洵需世之才有用之學而晚  
暮遭逢罔究厥施惜哉公嘗居桂巷山中學者稱桂  
巷先生不佞與公生并一世而年輩既後常以未承  
緒論爲恨公從孫榮暲謁幽堂之誌累辭以非其人  
而厥懇彌篤感其苦誠遂力疾而爲之銘銘曰

嗟嗟魏公南國之紀奮起遐陬紛有內美絢錦日章  
庶溫而理聲聞九天 敦命鼎至賁然來思爲龍爲  
光披腹琅玕萬言其章薄試牛刀粗跡循良用何能  
究惟德之將苟展厥蘊何施不臧 息遇終始并徵  
其書百世同藏木天石渠視履考祥以永令譽遺風  
餘韻竦動髦士天冠峨峨一路仰止有鬱茶山秋柏  
不死千載朝暮伊誰來云列辭幽墟用俟子雲

鎮安縣監金公墓誌銘

并序○己酉

吾妹婿金伯元委禽二十六年而吾妹死十三年而  
伯元歿又五年而孤甥炳愚述遺事乞銘余癯朽垂

死不能泚筆不惟不能亦不忍也常恐風燭奄及齋  
恨千古遂力疾而敘之曰公諱泰根伯元其字也系  
出安東先祖右議政文忠公仙源先生諱尙容立懂  
江都吏曹叅判水北公諱光炫丁丑後謝官自靖不  
須譜也高祖諱時侃通政縣令 贈吏曹叅議曾祖  
諱毅行 贈吏曹叅判正學惇德爲世名儒稱雲泉  
處士祖諱履成刑曹叅判抗言不諱受知 聖明爲  
健陵直臣考諱最淳通德郎妣坡平尹氏承旨勉憲  
女判書翼獻公陽來其曾祖也壺範儀式宗黨公生  
稟凝重幼而不妄語不嬉戲藝業夙就庚午中生員

甲戌除 思陵叅奉戊寅拜翊衛司副率時 翼廟  
在春邱行冠禮推 恩錫馬辛巳陞繕工監主簿轉  
司憲府監察東部令壬午出監鎮安縣廉公誠勤百  
瘼俱祛忤道伯見罷遂絕意進取日以聲律自娛壬  
辰十月二十三日卒距其生戊戌正月八日爲五十  
五歲癸巳正月二十四日窆于保寧閑谷乾坐從先  
兆也配南陽洪氏卽吾先子長女貞介如古女士咸  
稱鸞驪齊德先子同知敦寧府事諱履簡別有誌繼  
配高靈申氏正權女炳愚及尹冕求叅奉趙秉履妻  
元配出炳三叅奉繼配出出繼炳愚男厚均尹冕求

二男哲榮弼榮餘幼公天資質直容儀豐美望之粹  
然是厚德長者也性於孝事父母有深愛居憂哀毀  
逾制常痛祿不逮養染盛芬苾務盡誠敬友愛同氣  
垂老同爨融融有春津之樂視姪如子教以義方待  
宗族鄉黨不設畦畛無所修飾人皆悅服居恒息交  
門屏閒寂而遇會心人披襟道素辭氣藹然雅向冲  
曠不以事物經心居處朴陋凝塵滿座而形神超越  
家世清貧計活聊落而不營產業典邑四載田不增  
一畝屋不易一椽脫略世累靡所介懷而聞朝廷政  
令得失憂喜形於色辭其忠愛根天如此治邑寬嚴

得中捐俸割廩用紓民力持正守法毅然不撓苞苴  
不行關節不通及罷歸行李蕭然蔬糲不繼而怡如  
也潛靖自守未曾躡足要路或勸其降志公笑曰澹  
泊是吾分耳詎忍乞憐屢折腰於五斗耶癖於詩音  
韻溫雅自成體裁爲藝苑鉅匠所賞歎平居坦蕩與  
物無競度量恢弘殆范六丈所云無怨於人者去官  
吏民懷其惠既沒士林頌其賢公族祖江右公履載  
對余言吾門真士夫惟有伯元是所云魯無君子斯  
焉取斯者歟公居烏樓山西寒水洞中余取朱子詩  
意名其齋曰秋月公要余記其事文未及就而公遽

苑矣每見寒江秋夜素月揚輝未嘗不懷公襟韻也  
和淚而爲銘銘曰

嗟嗟伯元鍾美名家忠信爲本悃悃無華險夷不滯  
克保太和荆棘蓁蓁我行如矢朱炎赫赫我心如水  
末路虛僞羊質虎文孰若夫人徹底清真玄酒大羹  
味在無味彼夸毗者疇識其貴閱世滋久益知公賢  
撮其微躅式旌幽阡

潛軒金公墓誌銘

并序○己酉

慕齋息齋兩先生講道於龍岡彬彬存西河之俗有  
曠世聞風而作者潛軒金公宗信是已公字朋甫系

出清風以高麗侍中諱大猷爲初祖入 本朝有諱  
勵翰林安東府使生諱支東蔚琮縣監始居關西四  
傳至諱鼎文科谷山府使以文學顯又屢傳至諱鍾  
鎰諱舜弼諱天授諱益聘世篤孝義是爲公高曾祖  
禰也妣慶州金氏道潘女閨範克著教子義方公生  
稟聰穎晨昏之餘不離親側人有饋者不先入口歸  
獻于父母弱冠詞業已就累舉不中常以徒欺親心  
悔責廢舉專心學問鑽研名理踐履敦確持守純篤  
晚學易象傳義靡不理會好禮本以朱文公家禮  
參之東賢問答辨析明哲隣黨待以成禮倡率同志



創興學契建塾舍儲書籍與學徒藏修游息一鄉風  
動旁通趨勒之妙爲一路所推詡而不欲以一技自  
名焉性于孝志物俱養滫瀡不置居憂哭不絕聲毀  
瘠幾滅性宗族齊會勸肉而終不聽朝夕展墓未或  
一日廢每值喪餘號隕如袒括具墓石儀靡不用誠  
兄弟六人友愛甚摯同宮共爨庭無間言及析箸相  
與推讓自取其荒頓不能自給而周人之急甚於已  
私接人無貴賤尊卑各盡其道身處草澤而忠愛根  
天 國哀輒飯素處外不與人笑諧朔望與里中子  
弟登山望哭盡哀而止是皆孝之推也 純廟己丑

二月三日歿距其生戊戌爲五十二葬于龍岡船橋  
之艮坐從先兆也齊蔚琢林氏學生載夏其考也克  
配公德舉二男亨鍊亨鍊二女適李升謨朴勉達正  
洙正湜金履九林貞桂金泓九妻亨鍊出林益時妻  
亨鍊出李升謨子鳳祚公性度沉重端嚴喜怒不遽  
言笑不妄視流俗不啻若草芥以故不悅者多而終  
不變所守守身澹泊食不願膏粱衣不厭弊緼常訓  
子姪曰用力於忠信孝悌則便可臻聖域雖周孔之  
學不必他求推自修之實誨人不倦爲譽髦矜式信  
能充闡志業可但爲一鄉之善士哉正洙從余遊志

行雅潔余愛好不已歎其克趾先美一日齋金君勉  
恒狀德之文謂銘苦切竊感其真誠力疾而爲銘曰  
公有至性得之自天旣畀以厚胡齎其全均厥報施  
疇秉化權公所遺孫不以財以安孫所顯祖以賢不  
以官斂以歸之堂斧之中不朽者存幽明感通

梧亭姜公墓誌銘

并序 ○庚戌

潛隱姜公秉尊攘大義遜世自靖後孫繼聲世濟其  
美至梧亭處士諱械克紹志業無愧爲一路之善士  
於乎休哉公字聖居晉州人系出句麗兵馬元帥諱  
以式奕葉蟬聯爲三韓望族入 本朝大提學諱淮

仲副提學諱澈應教諱德瑞以文章道義名世不須  
譜也應教公有孫諱恰是爲潛隱公逮 孝廟勵志  
復雪監山陰縣 孝廟薨復遂初服于太白山中卽  
公五世祖也曾祖諱再光祖諱咸一考諱沈俱以遺  
志隱遯不仕妣曲阜孔氏以 英宗辛卯正月十二  
日舉公于安東法田村第生稟慧悟未就學輒記傷  
人授書受業于伯氏伯氏公文行爲一門望撫愛公  
靡極不至督課施楚而抱持涕泣公感奮策勵稍長  
從從叔父柳川公翰學柳川公漢門高弟爲一鄉宗  
師得公器重合朱書二十一篇栗谷東湖問答傳付

公俾資誦習公益自警惕負笈蕭寺攻苦食淡夜以繼晷屢舉鄉解不利南省歎曰榮枯有命豈爲無益之求隱遯求志我家青氈遂挈家入白華山中塞兌守靜劬書研理最好朱書手抄口讀潛心體究樂而忘憂不知老之將至晨起謁廟整齊內外緼布菜茹處之怡然居鄉無親疎壹視以忠信非理相加者雖直不辨口不道人物臧否時政得失周恤哀慶隨處盡分鄉黨悅服又遷居懷仁五鳳山下公憫其俗習蚩質恂恂諭誨上下孚感日與村秀討論經旨携鄉父老徜徉阡陌植杖觀稼或賦詩爲樂晚又卜築于

永同之梧亭取近從姪時煥攸芋也呻咭之暇時自鋤圃用附蘇雲卿灌圃古義素不喜追逐不出山門幾數十年壬寅以待從 恩授通政階而不具朝士服飾享年七十七卒于 憲宗丁未五月十三日窆于本縣白馬山坐乾之原配興陽李氏光坤女蒼石公竣其先祖也附公墓左別有誌生二男斌煥出后長煥前正言二女適李必煥宋智洙斌煥子彝重載重女李達英長煥女李觀翼李必煥子寅協女姜璣重餘皆幼公孝梯天植常以冲齡失恃不識慈顏爲至痛未弱冠又罹外艱毀瘠幾滅性每值喪餘致齋

備具務極蠲潔號擗如袒括遇時物未忍先嘗居恆  
輒廓歔嗚嗚如窟人無所歸伯仲氏皆歿竭力成  
喪事二嫂如母叔母金氏年邵從嫂及其孤女窮簷  
無托公衣食必先進叔母事必咨稟撫恤其孤女靡  
間已出爲叔母終事嫁諸女資遣用盡誠力從姪致  
煥染疫死客土公與從兄梯同往斂殯從兄亦以是  
疾切公又哭臨躬檢初終人莫不危之竟無恙是皆  
孝之推也教諸子義方長胤繼伯氏后浚以不貳本  
爲戒及次胤策名恒使之辨析義利舉朱子家政家  
訓要言三編及與魏應仲書俾之服膺聞李山泉克

聲講道洛中作書備述托子之義仍教遍交并世羣  
儒聞其唱第勉以刊浮華從儉約又曰通籍致身汝  
身非汝有也殫誠圖報是乃移孝於忠忠孝清白卽  
吾世業苟或壞名災已不但一身狼狽墜先法負師  
教也又曰昔我潛隱公之垂裕後昆衣綿布食蔬糲  
茅屋芒屨不改其度而今未能焉所宜識戒也次胤  
以栗峯郵官遷其母夫人墓公勗以節省又戒以居  
官耐煩之道治家正名之義皆可爲永世法也及就  
養于官不接聲妓服食如山居其素性恬約類此御  
奴僕嚴而有息死於廊底者不敢殯哭公許之曰昔

人有許葬階下者生而許其家死而禁其殯可乎人莫不輸款効忠嘗歎近世心性之說互相歧貳曰是不過義理上意見參差非若川洛東西也初學不宜先自主張窮極體驗待有定見始可折衷又曰心性本源曷可雜氣質而言人與物性俱是一理理既一則性豈有二心本善而氣有善惡則氣質可以當心乎本無二性而氣質本然之有二者氣也非性也俱是一理而人與物性之不同者氣也非理也心則本善而發有善惡者亦氣也非心也所同者心體也性理也所不同者氣也今以心之既發者掩其本體而

曰心有善惡欲以氣質者當之以形氣之不齊者混於本然而曰人物不同欲以偏全者歸之恐於程朱之論有所逕庭其名理超卓非世儒可及也不喜著述嘗有經史劄疑以不滿意而去之蓋其謙虛退讓不求人知畢生遵晦不屑以經術標揭故世鮮知德而幽光潛懿於是焉存庶幾不嗽不昧安時處順者歟正言君曾從余遊服公行治甚悉今以狀屬余爲幽堂之誌余曰公內而不出用自成德是所云道隱無名復何須於銘君曰唯唯否否墓而無誌何以備陵谷之變噫樂道人之善以告來者固君子之心而

况公之賢有可以不朽者乎遂力疾而爲之銘曰  
君子之德不見而成崇本敦實常恐修名超然絕俗  
養粹巖扃其孰尚予安素居貞孝悌爲政行滿家庭  
何以致之玩心研經名理自醇佑啓後生嶽嶽馬岡  
恤恤崇瑩碩媛同室百世永寧述詩誦賢用裨世程

處士李公墓誌銘 并序 ○庚戌

栗谷李先生盛德大業爲百世宗師垂裕後昆克紹  
先懿至八代孫諱黠篤學力行爲法家拂士於乎休  
哉公德水人字與之曾祖諱惇五西部叅奉祖諱伯  
掌苑別提考諱仁林金山郡守世襲宗統尸先生祀

郡守公娶安東金氏夏一女舉公于漢師里第氣清  
容端順父母志纔就傳隨金山任所向壁呻咭不少  
顧眄德器夙就爲鄉黨所稱述郡守公患癘而欲金  
夫人問及後事則曰仲子孝友詳慎必善措置毋憂  
也時公年二十餘居憂毀瘠幾滅性喪禮壹遵沙溪  
備要事母至孝常患菽水不給與諸弟各出米穀名  
棣萼契常供甘旨生朝必設盛饌會子孫宗族以爲  
樂晨謁家廟哭諱如袒括沐浴致齋先瑩石儀罔不  
備具常歎文成公全書無刻本其傳不久謀及縉紳  
繡梓藏板用垂永遠文成公夫人盧氏貞烈碑埋沒

紫雲先墓公懼先志未遂轉運海路立于聽溪堂後以替 旌閭伯氏早歿公攝宗事教音宗姪及孤弟俾底成立治家有度必遵擊蒙要訣事邱嫂如母錢帛分寸不以自私推及宗族務盡敦睦疎屬有孝婦周恤其窮獨常恨古冠禮不行曰吾先祖嗣孫當用三加之禮述文成公冠禮圖式爲宗孫敏道行之一鄉歆服少時將應舉聞主試者曾以邪學得罪遂不赴圍屢發解不利南省未四十停身專精問學樹屋溪堂之倚堂卽先生攸芋也常處是堂用寓羹墻之慕扁其室曰念修堂西有石泉清漪卽先生濯纓處

也鑄石品題隱屏下又築仰高臺勒地不忍廢水不忍荒八字用述顏樂亭故事紹賢廟庭舊無碑公謀豎牲石又樹崔東臯所著石潭事蹟碑于瑤琴亭夙講華陽大義鑿 皇明太祖御筆忠孝二大字於隱屏石面仍刻尤菴筆高山二字游詠興慕曰爲士者先立脚於節義則學問自富不差嘗請學于鰲村宋文簡公文簡公讓抗慙丁而公舉生尊信冲年師爲斌斌歿爲置祭田忌日輒不肉讀經傳必整冠帶雖詩繆不卧看口不道俗諺目不接雜書克謹內行子姪男女不親授不同席嚴於享先子弟或進饌失次

切責以誠敬不足曰此忘孝也待墓村人述紫陽古  
義必致悃款遇奴僕有恩曰此服事先世者也爲朋  
儕所敬憚不敢戲謔於側偕院儒講學或行鄉飲之  
禮晚號所居室曰自己窩製銘以自勗髦士稱自己  
窩處士嘗劬業於山齋一日家人告失牛公讀書不  
輟曰吾已知之還家亦無一言及失牛其忘懷得失  
類此居恒莊默端拱靜坐常夜誦心經近思錄人或  
語及心性理氣則曰千古名理至朱子而折衷我東  
則栗九兩先生有定論外是則贅也方伯守宰多詢  
變禮疑文再登剡薦晚益好學不以窮乏爲意胤子

欲服田力穡公戒曰貧富在天詎可力致祗宜不廢  
勵業毋喪本心也享年七十六而卒于戊戌正月十  
四日葬于石潭良坐有二配昌寧曹氏櫛女殉先公  
四十一年墓附清風金氏紆天女舉一男全孝全孝  
二女柳正麟吳珍噫孟子云行一不義殺一不辜得  
天下皆不爲朱子釋之曰有所不爲心之正也文成  
公載諸要訣又編入自警文而曰以此意思存諸曾  
中公揭座右誦釋教宗黨子弟曰是爲吾家相傳心  
法也斯可驗造就真正無愧爲文成公肖孫可但爲  
一路之善士哉不佞服公名行夙矣全孝從我遊謁



隧道之文誠懇苦切未可以瘞病辭銘曰

有美一士西土之望猶玉在璞猶金在礦居貞用晦  
不售其珍斂華就實以養吾真孝友爲政本乎求仁  
克紹家學翹厥真源寤寐羹墻終不可諼建塾施教  
鄉髦如雲遵述先矩扶植斯文名德孚感庶幾懿醇  
有血斧堂石潭之原秋柏不死亭亭歲寒淵邱雖易  
體魄是安納銘幽墟永世不刊

敦寧府都正李公墓誌銘

并序 辛亥

國東門外十數里而近有海等村枕壬之原卽敦寧  
府都正李公衣履之藏也公諱敘字季浩初諱瀚避

國始祖諱改今名晚年歸老於鄜溪自號曰鄜溪居  
士系出德水以高麗中郎將諱敦守爲鼻祖圭組蟬  
聯爲海東世胄工曹叅議 贈判書諱揚知敦寧府  
事康平公諱明晨司諫 贈領議政諱宜茂左議政  
文獻公諱荇禮曹判書文惠公諱安訥其最顯也高  
祖諱柙大司諫 贈左贊成曾祖諱光夏漢城判尹  
贈領議政諱貞翼祖諱璣左議政 贈領議政忠憲  
公考諱周鎮吏曹判書 贈領議政忠靖公妣驪興  
閔氏 贈貞敬夫人左議政文忠公鎮遠女也閔夫  
人克承先訓淑德純行有古女士風公生而容貌俊

偉性度凝重在冲齡動止如成人己巳丁外艱情文  
備至辛未遭內艱守制如前喪毀瘠幾不全己卯始  
以門蔭筮仕內則翊衛司洗馬司禦衛從司左從史  
造紙署別提掌隸院司評平市署令司饗院主簿三  
辟宣惠郎繕工監副正敦寧府都正五衛將外則平  
康縣監清道載寧郡守大邱判官南原潭陽富平府  
使光羅黃驪四州牧使 健陵甲寅三月十八日卒  
距其生戊申二月十六日爲六十七歲是爲公終始  
大略也公生稟絕異而忠靖公及閔夫人義方之教  
甚嚴以故德器蚤就容止中矩少讀性理書從學陶

庵之門講習薰陶老益好學誦繹擊蒙要訣小學論  
語見古人格言輒揭座右警省雅言學問雖貴淹博  
亦當反約不可馳驚於無實之地小學一部是做人  
坯璞用作究竟法何患不爲君子又曰士大夫雖不  
可從俗脂韋亦不當泥古崖岸觀論語鄉黨篇聖人  
之動靜云爲曷嘗有詭激處乎性於孝居憂五年不  
入中門夫人有疾邀醫診候必用女奴居廬墓側晨  
夕哀省祁寒盛暑不脫經帶對人非喪事不言服闋  
晨謁家廟齋餘號擗如袒括終月不復寢少治功令  
華聞夙播戰藝費庠輒居上游連捷解額永感後遂

絕意公車伯氏忠穆公仲氏副學公相繼登第歎曰  
使吾弟獨不免沉屈蔭路耶謀所以周旋榮塗公不  
可曰舍先蔭而求科第自非好事亦不念盈滿之戒  
乎二公歎賞曰君意如是可不成其美乎自吾東嶽  
先祖迄今五世名位太盛共勅嗣子曰勿赴舉如季  
父仍著爲家訓事伯仲氏如嚴父晚年仲嫂篤老善  
病公愛敬備至寒煖滋味親自調適推及宗族朋友  
皆曲盡情禮在平康鄉俗貿野以興學爲先務捐廩  
鳩財坊邑皆設庠熟置學田蓄經籍擇秀士爲師豐  
其廩料俾掌教導如明道上元之爲又置講武廳農

隙教騎射纜數年治化丕著旣遷鄉人立祠揭像春  
秋俎豆莅大邱捐俸築堤起偃虹亭邑人賴之號曰  
李侯堰時忠穆公付處長淵公不自安懇道伯罷黜  
上特宥忠穆公仍公之官公守身如處子足不及權  
門居官盡職親戚窮乏亦未博施曰費公濟私某所  
不敢及解紱行李蕭然田宅不長尺寸是乃畏知之  
清也子夏云雖曰未學吾必謂之學矣者公非其人  
哉使其高蹈雲衢鋪舒事功則所以仰贊 熙朝之  
感化者恢恢乎有餘而素所蓄積僅施於百里經濟  
惜哉公聘礪山宋氏大司憲文載女溫良清淑婉德

無違生與公同年歿先公二十二年繼配豐壤趙氏  
處士儼女莊惠子諒婦道亦宜生後公十二年切先  
公十年俱 贈淑夫人墓附男縣監學彬宋氏出繼  
忠穆公後取族子道彬爲嗣蚤歿女適南正紀側出  
也道彬繼子曾瞻學彬繼子是女適趙海永沈宜觀  
尹膺一庶子最南正紀子燻魯瞻子膺信女適徐種  
淳庶女洪鍾聞晁繼子得信參奉趙海永子秉元郡  
守女適柳承根餘并幼膺信謁不佞以幽堂之誌不  
佞先祖考與公托歲寒之契以故悅服公行治夙矣  
靡敢以瘡病辭不佞嘗覲親於達城貳牙見枯株挺

立老吏稱李侯勤政夜以繼晷庭燎所熏木以燒死  
閱累十歲不拔者猶爲人愛惜云可驗公政教之一  
端也昔歐陽永叔銘范文正之墓不書麥舟事不佞  
竊附是義撮其梗槩如右竊恐枝葉之繁反掩本實  
也銘曰

嗟嗟李公熙世席琮鼓篋寒泉嘯嘯道真孝弟根天  
忠信孚人名實相符文質俱彬宮僚 三朝橫經  
銅闈受知 貳尊榮極布衣苟升天衢何用不宐門  
闡昌熾戒存離披低回民社召杜龔黃本之德行粗  
迹循良八邑絃歌敷教用寬潮祠柳廟於粲荔丹投

老歸歟于鄜溪濱敬止桑梓用自存身昭朗令終葆  
我真樂血海岡鬱鬱拱木勒銘玄扃用備陵谷

吏曹判書諡文肅朴公墓誌銘

序并

粵我 純廟在宥有以肺腑親任柱石重身佩安危  
二十年雖未免中道跋躄而鞠躬盡瘁終始匪懈者  
故吏判諡文肅朴公是已公諱宗慶字某貫潘南麗  
季有諱尚衷以道義與圃隱齊名號潘南先生生諱  
譽入 本朝封錦川府院君諡平度五傳至諱紹道  
德學問爲己卯諸賢所推重以司諫論金安老學者  
稱冷川先生孫諱世城 贈吏曹叅議己亥議禮斥

尹善道權諡以直節稱是於公爲五世祖也曾祖諱

弼履 贈吏曹判書祖諱師錫判公州 贈左贊成

考諱淮源判敦寧府事 贈領議政諡忠獻號錦石

學業勳勞詳載 純廟御製碑文妣原州元氏 贈

貞敬夫人 贈吏曹叅議景游女慈仁貞淑有女士

風以 英宗乙酉某月二十一日舉公于墨洞外氏

第方分婉也忠獻公夢見一童子騎鶴下天門雙手

捧之及生穎悟絕倫纔八朔能言語行步七歲能賦

詩爲贊成公所鍾愛 正宗庚戌中司馬試丙辰筮

蔭仕童蒙教官陞司饗主簿 景慕宮令除順安縣

令換新溪因事棄歸 純廟辛酉拜司僕寺判官忠  
勳府都事是年冬擢文科拜弘文館校理司諫院獻  
納兼實錄記事官漢學教授壬戌拜弘文館應教奎  
章閣直閣議政府檢詳舍人兼南學教授以尊崇都  
監都廳勞陞通政拜承政院左右副承旨刑禮曹參  
議檢校直閣癸亥拜左承旨吏戶曹參議甲子差實  
錄修撰官出爲驪州牧使尋拜弘文館副提學以廟  
奏差備局副提調又拜奎章閣直提學乙丑以廟擢  
陞嘉善差備局有司堂上拜禮曹參判副摠管春秋  
館義禁府 經筵實錄同知事吏曹參判都承旨工

曹參判同成均刑戶曹參判平市署尚衣院承文院  
典醫監宣惠廳提舉嶺南句管丙寅差貢市堂上以  
伯氏長度支嫌一門之并縮財賦疏乞遞 上不許  
己巳拜弘文提學摠戎使 特除兵曹判書晉秩資  
憲拜知義禁造紙署提調庚午拜漢城判尹吏戶曹  
判書知 經筵奎章閣提學知春秋典牲署內醫院  
宗簿寺觀象監提調關西句管辛未 特除訓練大  
將拜都摠管知中樞禮曹判書司驛院提舉壬申拜  
宗廟署提調工曹判書左副賓客復拜訓將以叅校  
璿譜撰修事陞正憲拜濟用監提調司憲府大司憲

議政府右叅贊冬補揚州牧使尋下內移之 命乙亥印 列聖御製以監董勞陞崇政復除訓將丙子以 惠嬪襄禮部監堂上及下 玄宮銘旌書寫進階崇祿拜右賓客丁丑以 景慕宮修改監董陞輔國拜左賓客其所屢典者如再管貢賦三摠元戎四掌度支五任東銓是也若壬申之復除右叅贊內移後工曹判書知敦寧藝文提學甲戌之拜御將崇政後判義禁左叅贊乃公之處義不出者也前後所蒙被 異數則唱第之日 貞純王后方垂簾教曰此時此家人有登科者既在保護宜任輔導特授館職

又 命致脩于元夫人祠版築埽給由馬備澆奠甲戌以入燕勞有鞍馬田宅奴婢之 賜子婿弟姪并令調用辛未之在訓局也猝有西警羽書交馳時昇平日久都下鼎沸公務鎮物情默運紆籌賴以時月討平壬申冬都憲趙得永上疏論公辭甚急 上震怒下嚴教曰此重臣處地何如今日又何如時以其處地倚毗於今日豈爲私昵而然乎一則爲國事也二則爲國事也忽以虛無罔測之言如是陳疏無復餘地况其末端云云此又萬萬無形之詬辱卽施譴削之典公曰此余自反處也若能早自決退遠避榮

途豈至於斯乎卽納符出都門轉向揚州村廬上  
下敦勅若曰委任之久豈重臣咎也使重臣狼貝乃  
予之致也若曰無難鄉行壞損分義若曰橫逆虛無  
之說本不足憚歷屢日 嚴旨荐降公轉益危蹙席  
藁城外又 教曰不念予心不顧承候但靳持較絜  
於不倫之說豈非孤負予眷眷乎因 命不敘越數  
日 特命因任連勅召牌公惶懼不敢進 上以師  
律命記過公詣闕下猶復逡巡又 教于政院日夜  
潑矣今方殿座何不受符公不得已膺 命卽 命  
分揀翌日陳疏乞退畧曰惟其背馳二字之誣巖用

意至僭直驅之以護逆黨惡之科臣以臣家之人處  
地自別彝性不泯其於大義所關大防所在豈或有  
少忽於明張之義哉今忽遭前古所無之惡言無端  
怨憾肆口詬辱末乃以此二字抑勒構誣必欲溘滅  
臣家而後已今臣所遭世復有哉又曰臣行已無狀  
處世昧方受人媚嫉僂辱身名在朝爲不忠之臣在  
家爲不孝之人每一思至心肝摧隕寧欲溘然無知  
奚暇論官職之去就乎 批曰予於卿所遭不欲索  
言而卿之情事宜有一伸特許所請俾安卿心自是  
有除鞫引 上以不念事體於是有斥補楊牧之



命數年後始以 飭教轉嚴復領訓符然益懷懍懼  
每欲決退而未忍僂訣常曰古人云進亦憂退亦憂  
此言真有味其內行則幼而事父母孝未嘗有纖毫  
違拂丁卯遭忠獻公憂水漿不入口毀幾滅性家人  
勸之以薑桂而終不聽與伯氏判書公友愛尤篤事  
之如父及自違疾至于屬纊焦煎號慟如不欲生撫  
諸姪恩義備至皆有所成就祭祀尤致誠敬前期必  
齋沐汛掃躬省鼎俎務極蠲潔凡係先事靡不用極  
五世以下遺稿次第校讎登即劄劂先墓之舊無顯  
刻者亦皆營辦無憾家法嚴正動遵禮訓從子有將

婚未醮而遭叔母喪其母夫人病徂瀕危願早畢親  
公據菴服不可嫁娶之文必使除服乃婚從子周壽  
之入閣選也曰吾既忝此任汝復踵武可懼非可榮  
况有先兄之遺戒乎竟陳疏不赴職與從弟瑞與公  
趣尚相合自經禮文史以至國朝典故人物淑慝常  
講貫勉勵及歿如喪同氣性本尚儉房闈之間蕭然  
無玩好凡服飾稍涉奢麗輒不御御臧獲有法度痛  
禁童奴皮鞋用杜青鞵之漸自妙齡優於幹事伯父  
近齋先生每謂以才器周通忠獻公中歲困躓流寓  
驪江喪配又患疴沈淹積歲調度甚窘公竭力拮据

上奉下濟一室賴焉 正宗丁未 綏嬪膺選入宮  
忠獻公及判書公受 命保護常在 禁扃凡百家  
事公皆主之井井有條理其措諸處官則剛毅明斷  
嫺習世務雖金穀之簿日不暇給而剖決如神案無  
留牘西寇既平以陰雨爲戒廣造戎械俱極精緻雖  
武庫之闕其名皆照投圖式有良工匠不能曉其法  
者其於財賦謹節度祛冗濫歲入恆有餘裕惠局月  
椿至爲四十餘萬嶺南儲置穀支用無節元簿漸縮  
公遂 筵稟那兌他穀十六萬石名以丙辰別置補  
逐年常用自是儲置無欠別造水車備六廩禁火之

具市人至今頌惠綜理微密皆此類也其掌銓則專  
以恢公擇材爲務人不敢干私履歷冤屈者雖疏逃  
幽滯必檢擬無遺每當初仕選補預錄泮儒姓名如  
夾袋故事嘗夜坐寒甚歎曰哀彼窮荀必多凍餒吾  
何避子產乘輿之譏仍使親信者腰錢散之亦使不  
言其所從來計費爲累千金有一士人以無名終不  
受公嘉其操守卽按問姓名擬諸 寢郎其愛養軍  
民則恩意曲洽西警時將士之從征者頒藥輸饌相  
屬道路又以米布頻問其家屬且慮債家之或攘也  
發校禁之軍士莫不感奮効死米綿頒貢每從貴給

直用裕都民生活庚午大歉朝家糶常平穀以救民  
公使精抄飢戶而封標囊橐分俵均平賴活者爲數  
萬口以故捐館之日軍市號哭如嬰失哺一日將造  
朝門下喧甚有客阻於闈公招問之客曰家貧喪婦  
無以爲殮公曰費當幾何而足客曰五百錢矣卽與  
之五千錢客流涕而去一朝士素不相識而寓同開  
亦喪配未殮公聞之卽遣一役從主家言備初終需  
此其周窮急人之一端也少事近齋先生孺染義方  
篤學不倦雅不以詞章自命然臨文構思自合規度  
訓導子弟嚴立課程雖公務繁劇必躬自照管素愛

人士推獎假借不以貴顯而少改是爲公踐歷行治  
之大畧而最其忠愛惻怛出於天植甲戌冬 純廟  
有瘡候公以別入直不脫公服坐而達曙爲五十餘  
日終無倦苦色及瘡核當拔玉體痛甚醫莫敢近以  
手又以久益株蔓爲潑薦公遂褰袖而進曰少忍無  
妨臣請試之 上勉從焉至拔核而退流汗透衣自  
此獲翌瘳慶苟非滿腔衷赤拚置一身於死生禍福  
之外曷能乃爾哉始自忠獻公與判書公相繼下世  
上之所眷遇委任專在於公公亦自擔負至重大而  
軍國機務細而財簿管轄與夫臧否黜陟民生苦樂

常自靜居深念至廢飲啖或輾轉床褥明發不寐雖  
侍側者莫省所由是以年纔四十頭髮爲之盡白嘗  
置別墅于東門外敦巖爲晚年菴裘計因以敦巖自  
號然眷戀 王室罔克遂初時於公暇幅巾杖屨逍  
遙山水間澹然忘歸丁丑十二月一日考終于正寢  
壽止五十三訃聞 上震悼命賜東園副器成服日  
親製文遣承旨致脩曰維卿材器繼父兄蹟委以國  
事心膺是托周旋奔走夙夜殫竭視卿手足今焉如  
失倚卿干城今焉如撤旨念國事誰任其責再葺又  
親製文賜祭隱卒之典極其哀榮翌年禮月權葬于

揚州海東村己卯閏四月移奉驪州首蓆洞巽坐原  
元配德水李氏僉知中樞府事 贈吏曹叅判述模  
女婦道甚備宗黨稱賢生甲申卒甲戌亦始葬海東  
村遷而附左繼配平山申氏學生某女姿性和柔閨  
範無違癸丑生庚子卒葬于公墓之右乙原并無育  
取伯氏判書公第二男岐壽爲后文科判書生一男  
二女男齊元早歿女婚進士徐相弼洪厚膺公以俊  
偉之器通鍊之才服習詩禮庭訓立得忠孝本領其  
操節也責言莫奪其處事也明斷相濟庶幾有古君  
子托六尺寄百里之材具且躬處懿親膺受 眷畀

若將見匡濟挽回之效而消長有數榮寵招譏竟使  
公狼狽憂畏莫得展盡其用此非公之不幸實惟朝  
廷之不幸竊觀公謚狀曰世故多端人情難平不啻  
如叩嶽灑灑然轉眄之頃水逝雲空倏作過去冷劫  
而惟公憂愛之誠貫金石而質鬼神者固自在也此  
可謂知公矣公嗣胤以不佞出入近齋門下槩聞公  
顛末托玄堂役不佞曷敢辭遂爲之銘曰

潘冶裕昆奕世累仁篤生 綏嬪誕我 聖人冲服  
萬機倚毗維何天錫賢輔又於其家偉器英姿兆于  
鶴夢繼父兄蹟任軍國重銓注恢公財賦綜覈周流

三營干城柱石一身鞠瘁四十頭皓有何深念反側  
達曙西燧告警默贊廊籌外殄潢弄內成錦萋人方  
舍射公則自反禹鼎燭姦灑灑灑波晏晷言菴裘水竹  
蕭散匪無錢勇未忍堯訣然猶憂畏當世念絕罔究  
厥施天奪斯速 王曰嗚呼予失手足 奎藻賜脩  
哀榮兩極驪水之陽有崇四尺繫公之藏慎毋樵牧  
陵谷變遷我銘不泐

僉中樞黃公墓誌銘 并序

嗚呼昔在 健陵盛時鼓舞作成文治炳烺卽廊廟  
館閣赫然著稱於一時者無論已雖費宮蔭路甄拔

試可於百里民社之間者莫不有長者之風若故一  
水戶黃公懷抱利器發軔祿仕之中不克大究厥用  
而遺風餘韻尚有傳於家庭里社之間詩云雖無老  
成人尚有典型余未嘗不三復而有餘感焉公諱仁  
紀字景修初諱仁驥字展汝一水戶其號也黃氏系  
出昌原以高麗侍中諱忠俊爲鼻祖入 本朝有諱  
居正刑曹判書植福裕昆益大而昌遂爲吾東望族  
累傳至諱蓋耆敦寧府都正 贈左贊成贊成公有  
七子長判敦寧欽爲 三朝名臣第五司宰監僉正  
贈左叅贊諱鏞寔公會祖也祖諱運河知中樞府事

考諱餘大司諫妣延安金氏縣令相厘女方公之生  
知樞公占仙鶴集屋之夢及生骨格秀異長益俊偉  
勤學嘗隨教官入侍景賢堂 英廟問汝父奉接慰  
命久不還乃欲規避三司耶對曰臣父素講無隱之  
義非敢爲規避計以犯欺君之科 上善其對顧語  
東宮曰此他日汝之臣也應製稱 旨爲舉朝所傳  
誦乙酉贊謁漢湖金先生問爲已求道之要癸巳中  
增廣生員丙申掌議太學再上疏論事關忠逆者及  
斯文誣辱之由己亥丁大諫公憂捲室入報恩山中  
廬墓居喪盡禮服闋還京師時有 文孝世子喪公

以不能討復處義自靖不就公車者四五年至庚戌  
邦慶復尋宿疇甲寅遭內艱持制如前喪毀瘠幾不  
全丙辰拜 徽陵叅奉以祿不逮養爲至慟丁巳  
上特下新刊恩重經以寵之曰爾文學行誼予所稔  
知此經雖佛書亦一孝親之具忠孝無二致爾其識  
之兼 賜杜律戊午以奉審七 陵惟本 陵封植  
最盛特授七品職陞司宰監直長己未春計勅至令  
百官製衰服時有義不當服衰之論 命公製進跋  
文夏 賜春秋一帙曰天下固不可無此議論卽春  
秋之義也換授 宗廟署直長因相臣請久任 廟

事諮訪特多曰使 廟官皆如此人凡事可忘憂矣  
庚申 世子 廟見陞本署令六月 正廟禮陟公  
哀毀踰節後每遇 諱辰必食素三日以生朝之與  
健陵誕辰同日終身不進晬日之餐爲感曠世知遇  
也八月除任實縣監一心撫摩政平訟簡闔境稱頌  
而不悅公者齟齬不已竟遭讒言棄官而歸杜門却  
掃無復當世之志乙丑 貞純大妃喪以都監卽監  
董 國葬竣事又差儀軌卽以勞除引儀監察刑曹  
正郎再歷 宗廟令轉宗親府典簿壬申除廣州府  
判官值歲飢竭力賙濟無一捐瘠乙亥遞拜工曹正

郎歷 光陵令尚衣院僉正癸未除江華府經歷適  
公廨夜半失火一府倉皇公獨躬奉 殿中位牌指  
揮整暇時公已躋耆耄而精力不愆者如此已又重  
新修繕工役浩大而調丁度材擾不及民因落成延  
集耆老觴詠爲樂及歸沁民息之立碑頌惠丙戌用  
壽職陞通政僉知中樞府事於是與年輩長老日相  
追隨於泓淸樽俎之間風流弘長有香山洛社之趣  
而聰明不衰步履輕健觀者仰之爲神仙中人又居  
常不廢講誦身教子孫及辛卯九月微示憊命移正  
寢二十九日考終距其生丁卯爲八十五歲十一月

葬于報恩屯德酉坐配宋氏趙氏附焉公自少卓犖  
拔出倫類爲先輩所獎詡而孝友根性事事欲盡分  
承祭致齋圭潔值喪餘皇皇如袒括與姊氏友愛尤  
篤承奉姊婚待之惟謹教育諸甥昏娶先於己子析  
衣分餐一無間言此可以見公至性也御家和嚴兩  
至下至僕御皆肅然有紀律而人或有不理相干者  
輒無辨不校使自釋然有賤隸凶悖者詬辱洞中士  
夫靡所不至而獨悅服公是所云暴慢者致恭此皆  
公行治而士林之所稱述也所著有遺稿十卷美仁  
志三冊二必劄裁二冊藏于家公元配潘南朴氏考



相朝再配恩津宋氏考煥雲三配咸安趙氏考翼鎮  
男基瓚生員基轍趙氏出女適沈憲祖朴氏出庶子  
基玟女適趙嘉永李寅同基瓚四男鍾羽鍾林前郡  
守鍾爽正郎鍾奎女適尹泰周鍾羽男一淵女朴洪  
壽李公夏鍾林出后族叔父生三女俞致庠鄭耆朝  
金台濟系子耆淵鍾爽女李熺系子章淵鍾奎女徐  
相熹系子普淵尹泰周男秉益基轍男鍾昌生  
三男厚淵耆淵普淵公爲人負性帶氣英發倜儻人  
皆期以大受而屈於蔭路罔展其地步壽躋大耋以  
縻天爵孫曾繁衍餘慶有未艾者天道報施其在斯

歟語云留有餘不盡之福以還子孫寔公之謂於乎  
休哉直弼老屏筆硯而今於隧誌之托有不敢辭乃  
爲之銘曰

昌原名闕世有令聞公繩厥武受知 聖君賡詩跋  
議榮動儒班寵以麟經 恩出匪頒大器小用粗跡  
循良存心愛物若保如傷晚暮遵養婆娑邱園朋友  
攸攝靜嘉琴樽間以書史真樂在中年德俱邵昭朗  
令終律律德嶽恤恤幽宮煢煢孫曾福祿來崇我庸  
述銘用詔無窮

梅山先生文集卷之四十一

梅山先生文集卷之四十二

墓誌銘

雲湖任公墓誌銘 并序

鹿門任先生有弟諱靖周字穉恭號雲湖并以道學  
名世識者稱之爲二難時我 正宗大王養德春宮  
睿學天縱淹通百家兩坊侍講之臣實難其選公自  
弱冠時已力學富有隱然儒林間已著聞望壬午中  
司馬壬辰拜童蒙教官遷翊衛司侍直 書筵顧問  
恒屬於公公殫誠啓沃奏對如響於是經傳常講之  
外如井地經界學校貢舉及錢穀甲兵城池關防歷

代之沿革得失如誦已言叩之則應 上每傾心聽  
納亟加稱獎曰當今碩儒捨爾其誰據公所著宿預  
錄跋曰余癸巳甲午間在桂坊時所奏達者蓋十五  
六而不敢辜負特達之知屢有越俎之言已多取嫉  
於當時云而密庵金公砥行歎其爲三代後初有之  
文據此可驗公蓄積之一二於乎懿哉然當時媚嫉  
公者滋多而偏爲賊臣國榮所擠陷遂斂就祿仕乙  
未移典牲署主簿丙申監董 元陵方中之役秋出  
監松禾縣縣在海西最窮僻處吏頑民蠢邑隨以廢  
皆公莅之寬恕濟以嚴明暮歲之內治效大著幾爲

武城單父之絃誦矣道伯承當路指置中考京察點  
降下考銓曹停枳不擬者十餘年戊申敘復司饗院  
主簿移 溫陵令己酉出監青山縣當荐歉彫瘵措  
處有方民得安堵道伯御史課最啓褒 上教曰慣  
知所存於挾冊之時宜乎治績如此也特命加一資  
忡西樞銜於是一世拭目知向者擯斥實由權姦而  
際遇之隆未嘗有間於前後也若將有 恩禮之加  
於是者而竟以 健陵丙辰十月十八日卯時捐館  
于懷德注山之寓舍距公生丁未壽止七十於是士  
林相吊云斯文一脈墜矣吾師近齋朴先生誄公曰

內外本末有用之學分析王霸亦識時務君子以爲知言公器字凝重望而知爲有道君子居恒不以榮利累其心專意從事於古人爲己之學以居敬窮理爲上達之門路體驗於事爲積累於存養精思力踐六十年如一日而其發於緒論則雅言理無大小心無二用堯舜氣象只在當下便是天理流行處當爲卽爲當止卽止行一不義殺一不辜得天下不爲之意自在其中又曰錯看浦說有理氣二物之病將使孟子人可爲堯舜之旨歸於空言又曰朱子所謂氣之精爽四字浦中錯看認作被命受生之後隨所稟

之氣聚而爲靈覺至有清虛靈濁虛靈之論蓋以氣質末流良能本體打成一片而聖凡之心判作二物矣又曰人得正統之氣以生故卽此天地之心賦於人而爲心體能爲氣母不爲氣囿不以在天而有餘不以在人而不足又曰天命之性固當作本然而爲通天下一性之性朱子以各循各有釋之則各異之意亦在其中今以其各異而云於道字不可下本然二字則惡在其率性之謂而性與道判然而爲二耶己之性人之性物之性謂之本然則同爲本然謂之氣質則同爲氣質夫牛耕馬馳卽牛馬本然之理而

日畊曰馳不可謂同也若曰是專指氣質之理則聖人捨其本然而教人以氣質之理抑又何也此則公獨造高明所以剖析性理之源者也其見諸事行則事仲氏鹿門先生極其尊敬而連床講業兼有師友之資晚年鹿門偕隱盡天倫怡愉之歡早孤不省嚴顏以爲至痛事母夫人養志無闕及丁憂廬墓哀毀淨立不進薑桂之滋少治舉業族叔父以試官親近勸赴鄉試公舉李君行語義不敢從嘗發魁解以元配菴服未半不赴會及從蔭道進身周旋 銅闈若將朝夕大闡而遂廢舉自守櫟泉宋文元公以姨親

中知己愛好無間嘗稱公篤於天倫罕見於叔季事諸兄如事嚴父一室湛翁和嚴兩至中歲連哭伯叔二公而姊氏申夫人有古曹大家風從諸兄弟學通經知禮而不幸早寡無依公奉置隣近晨夕省侍及其歿繕寫遺稿鹿門集同其印行以壽傳後第四嫂李氏亦早寡無子公奉養于家曲意將順終事無憾而以未能立後爲至恨也嚴於奉先不以次支而或略於致慤以次長遷奉先祖祧位每當諱日克致如在之誠嘗論近世儒者如公昆季之盛者蓋未多見於公祀孫某積年之托鄭重未敢下筆者職此故也

任氏籍豐川始祖諱溫五傳至御史大夫樹西河府  
院君諱子松顯于勝國入 本朝有諱說歷事 中  
仁 明 宣四朝以文學致重各官至判尹提學三  
傳至今是堂義伯當 孝廟蒐羅英俊欲伸大義而  
以公可大任六界方面之重官至平安道觀察使於  
公爲高祖曾祖諱陞祖諱士元俱早卒考老隱堂諱  
適咸興判官妣坡平尹氏戶曹正郎扶女公於兄弟  
五人序居季公有三配光山金氏沙溪文元公之後  
相甲女蘇氏監司斗山之孫大頤女李氏評事李穆  
之後元燮女男烈金夫人出杰蘇氏出一女適宋基

鼎李氏出烈男持常基常時常女適李鎬杰無子子  
基常女適進士金箕協持常男百宅基常男百準百  
熙百憲餘不盡記墓在公州東倉午坐之原李夫人  
蘇夫人附噫鹿門公不由師承洞見大原妙道精義  
發前儒所未發陶庵許以操戈入室漢湖贊以十駕  
難追常窩李公敏輔云見理精純數百年所創有公  
受其傳付之重鹿門雅稱公見處卓然明透非吾所  
及公爲鹿門狀德如伊川之于明道伊川嘗云我昔  
狀明道之行我之行蓋與明道同欲知我求之於此  
文不佞於公亦云爾嘗拜公于注山之天雲樓樓臨

二塘荷香魚躍若有上下同流底意危坐其上肩背  
竦直披心道素誨諭諄復未覺夏日之爲永翌年又  
哭公于古宅溪山文藻風韻不散俯仰幽明不勝感  
涕微顯闡幽非賤分所宜而靡敢以耄癯辭力疾而  
爲之銘銘曰

西河之任爲國大姓圭組燁赫中莫與競篤生賢彥  
蔚爲儒宗藍呂岳胡宛在吾東理氣之辨洞晰明暢  
棣萼并秀墳篋迭唱深造自得以心爲師詎若世儒  
聞見之知 銅闈大闢化日方升簡選弘博充我兩  
坊公於是時挾冊登 筵天德王道有懷必陳契合

無間媚嫉遽乘一斥不復末路踳躑棘失棲鸞淵返  
潛龍迺遂初服水複山重在公何憾有識興歎無平  
不陂天運循環 恩諭曠絕簪履不遺人惟求舊增  
秩升資蓋公忱恂孚格有素同人師克先兆後笑賴  
有遺編名理玄通湛思奧識牖我羣蒙律嶽蒼岡血  
恤幽宮刻我銘章昭示無窮淵邱雖易不泐令名百  
世知有雲湖先生

蘿山趙公墓誌銘 并序

金文敬先生講道漢湖之上四方及門之士於斯爲  
盛賢愚隨材皆獲其益而有若蘿山趙公其出類而

傑然者乎公諱有善字子淳學者稱蘿山先生始祖  
成佐百濟溫祚王樹大勳封稷山伯子孫遂籍焉厥  
後圭組相襲入 本朝有鍾城府使諱世幹 厚陵  
叅奉諱世傑叅奉公舉孝廉不起寔爲繼世文獻之  
倡生子諱彥瑚爲府使后生諱進進士有才學與宋  
泉谷象賢爲道義交卽公五世祖也高祖諱必亨生  
員曾祖諱翼周俱克世經行祖諱昌愈僉中樞考諱  
聖躋亦稱長德妣慶州全氏尚斗女夢龍而舉公公  
生稟絕異纔就傅慕古文章劇讀南華旣而慨然曰  
小技不足爲遂勵志聖賢之學八山讀孟子自是求

道彌力遍交并世先覺講辨名理旣又與同志開塾  
居業于蘿山頂上立學規爲一方倡焉金先生歷臨  
是齋設講會命扁以觀善手書以贈焉公遂委身師  
事之與聞性道所造益深金先生每與公揚挖經傳  
蘊奧古今得失以至進修之要出處之義靡不反復  
誨諭嘗詡以識明趨正又勗以弘毅仍書贈廓而大  
之濬以潑之明其內而晦其外緩其末而急其本二  
十二字又命纂定考亭遺事師友淵源錄其所期待  
可見也 英宗辛卯中司馬 正宗戊申除 惠陵  
叅奉陞西部奉事辛亥移掌苑署奉事輪對以本署



是成忠文故宅請贖還 上曰贖還非難以無可還處故不得爲也對曰無子孫則當別立文字徵信來世 命述其事揭板 上覽其文嘉歎本署提調對曰非徒能文亦有經學轉內資寺直長陞瓦署別提卽移司憲府監察癸丑差祭 穆陵以陵軍家造泡事涉不敬呈課 上許以純實曰觀於輪對時已知有所守守令勿論文蔭武窠待窠差送是月除清河縣監冰槩自律以興學化民爲先務設講會以課髦士給米肉以禮高年釐正其祀享戒飭其葬埋每歲孟春依月令布法作條約曉解與民更始人有告不

孝不悌者援陳元乙普明故事以教之民多感服時值荐饑公屏騶畜屋撫恤慰諭俾無流移捐官廩貸隣糴以賑之所全活甚衆而其賑也男女異坐上下有序有遜讓之風道伯褒啓 上曰趙某循良之治豈不嘉尚 特命陞敘甲寅拜益山郡守清河士民至有擁馬流涕者又豎碑頌之及上任蠲徭革瘼蘇完瘡痍如清河之政道臣請與珍山相換 上以無端請換問備道臣道臣諉以衰病更啓蒙 允銓曹以年限爲拘 命勿拘丁巳莅珍山旋罷又以檢官事追咎金吾議獻失實 特命公罪勳放皆異恩也

庚申用優老恩加通政階拜曹司衛將 總廟己巳  
五月五日終于正寢距其生辛亥五月二十八日爲  
七十九歲一都多士奔哭盡哀門人加麻者五十餘  
人七月三日葬于府東北國士峯下摠持洞坐西之  
原先兆也淑夫人豐山金氏同樞昌履女兵曹判書  
子良其遠祖也柔順貞靜克配公德生先公四歲沒  
先公三十四歲附公墓左男綱溫生員以學行繼業  
若璧溫直溫及具潤成金錫洪南致正金祖觀妻庶  
出也綱溫男鼎休前縣監泰休教官女適生員李箕  
樂鼎休取從子熙道爲嗣泰休男熙道出系熙爽熙

百熙祿女未笄公聰明端粹氣和而毅辭婉而直雍  
容樂易自然有近道之資其爲學以窮理爲先力行  
爲本雅言窮理而不能力行則理無所湊泊力行而  
不以窮理則行無所指向必以讀書自得爲準有問  
爲學之方則曰自有節度不容毫釐差了整齊嚴肅  
主一無適卽居敬之要而慮其持之太過反生病痛  
故有栽培深厚之訓專心讀書探索奧義卽窮理之  
要而慮其求之太急反失本旨故有優游涵養之訓  
至其力行之要隨時隨事尋箇是處不知則已知則  
必要行間操存之要則曰慢些子不得急些子不得

是皆切已體驗而發者也嘗論人物五常曰萬物之所同者理其所不同者乃是氣也而非理之爲也今以性爲不同則是以其異體之氣擬論於一原之理也性與理一也而掃却程朱正論以性與理析而爲二理則屬之於人物未生之前性則屬之於人物已生之後以爲理同而性不同豈不謬哉又辨心與氣質曰心之爲物主於一身而神明不測其體本善而聖凡皆同故人之所以變化氣質而復其性本者皆是此心之所爲而今以駁濁之氣質混稱爲本體卽將何所持而變愚爲明變柔爲剛以至爲賢爲聖乎

栗谷曰心亦有本然氣質今諱其本然而專以氣質當之是乃沮千古爲善之路非聖賢相傳之心法是皆濫造獨詣見理卓然者也公性於孝先意承順務盡其歡晨昏拜階下居喪盡禮尤篤於追遠雖已老傳不廢晨謁非甚病必親承祭要竭誠力而後已服師喪期年忌日必爲位哭家貧屢空一褐終歲人所不堪而晏如也終日端跪表裏修整不被外物所侵亂存養既厚德性自涵冲和達於顏貌謙虛溢于言笑周旋進退不踰繩尺與人酬酢聲氣可樂至辨是非必斷以理義確乎有不可奪者其受賢師付托之

重者詎不宜哉留心經濟著時務八策條理燦然可  
舉而措之也時值耶蘇邪說漸熾公憂其流禍呈書  
廟堂請其闢廓其衛道之嚴見幾之明有如此者深  
究五服之制旁及師友之喪王朝之禮彙成一編名  
曰五服通考又有文集幾卷藏于家壬午鄉人士就  
公攸芋建祠賡享又舉道學事功之實疏請褒贈  
甲申領議政南公公轍回啓曰趙某傳習師訓居敬  
窮理工夫刻苦固窮安貧操行修潔雖其求道自晦  
而衛正斥邪之功遠近歸嚮粵自先朝屢加褒獎  
曰己知其有所守莅邑多惠政則又許以循良之治

如此者不可但以一鄉善士論者也多士請褒益驗  
公議翕然請贈承宣上可之贈左承旨夫故  
都之學肇自圃隱迄于花潭而花潭有見于數而未  
達理之全體及公作而踐述漢湖之正傳服習考亭  
之真詮門路旣的進修彌篤至老慥慥克底於有成  
蓋西京數百年來一人而已自任以鼓鑄後進掘衣  
鼓篋者常充衍門庭皆尋聲得音虛來實歸及疾革  
遺書以戒之曰立志以古聖賢自期待讀書以小學  
四書爲本行己以正直無僞爲度不顧利害惟義是  
求則庶幾君子之道其血惻指引臨歿纏綿者乃爾

故及門者彬彬有成章之美可以收功於永遠嗚呼  
其盛矣乎直弼纔勝冠屢拜公于所館其德儀各論  
聳動心目閱半百年而有不可議公二孫克紹先範  
從我遊謁幽堂之誌靜念知照有未忍終辭援筆而  
敘之系之以銘曰

維崧降精英豪輩出文忠文康卓出羣傑疇纘墜緒  
曰有趙公姿粹志高養以聖功就正有道允矣漢翁  
叩盡其聲以鳴洪鍾惟其信師造道自崇溫恭自牧  
繩尺在中本之孝悌自知爲仁主以忠信克潤厥身  
不聲以色所養者大藹然祥和積中發外劈劃善利

若辨白黑知幾斥邪如夜照燭忍窮到熟真樂怡怡  
閻錦日章幽蘭自猗窮經致用爲 聖主知薄試三  
邑絃歌洋洋是亦行道粗跡循良迺遂初服于彼蘿  
岡晚益遵養用晦而彰耄耄戒警厲志自強始終條  
理誦法紫陽螟誨蛾述陶冶一方若飲衢樽各充其  
量庶幾易俗功化無疆律律士峯若斧其堂焯德著  
美薦以石章石猶可泐公名不渝銘非銘公聊勸後  
儒嗟爾來世是型是模

剛齋先生墓誌銘 并序

過齋金先生道尊德成爲世儒宗因家禍削儒選剛

齊宋先生上章辭 召命仍言臣遊從於坐累人金  
正默之門義不敢比恆人 上詢于在廷大臣臺臣  
咸請金正默復逸以開末某進身之路 上從之仍  
諭先生進身之意先生又陳疏謝辭噫師與君父均  
故惟其所在致死死生榮辱義無異同而世教衰師  
生之倫先壞先生以一身之行藏雪先師之幽冤如  
此而後天下之爲師生者定於乎盛哉先生諱穉圭  
字奇玉生而端秀未髻鬣往觀外黨婚禮羣兒爭取  
絲花先生若無覩有與一朶者亦不受觀者異之九  
歲從內舅申公睦學已能潛心受書歸而取正于再

從叔父心齋先生仍講業于過齋金先生先生亟加  
獎勵期以遠大且言溫醇有餘但欠剛果命以剛字  
扁齋先生因書剛果浚烈四字揭壁自警及金先生  
定居于貞山先生徙宅而從之朝夕服勤戊午道伯  
薦先生以學有淵源望重士林除 英陵叅奉不就  
庚申拜侍講院諮議兼 經筵書筵官時 純廟冊  
儲位 正廟降別諭曰昔我 孝廟光陞儲位始設  
贊善進善等職以待山林之士金文敬公爲贊善爾  
祖文正公爲進善予承 先王之基行冊儲之禮而  
爾之從叔爲贊善爾爲諮議凡周亦世豈不興榮矣

乎爾以爾家之人講道丘園克紹家聲登旌招之列而縻挾冊之任予心欣喜何以形諭亟回東岡之志儀我講肄又命特去偽號於告身時心齋赴召而先生不出上疏略曰臣至愚極陋百不猶人少而失學亦不能從事舉業聖明之有此恩教者謂或得於家學緒餘而臣誠不近似實難免欺誣之罪我世子邸下睿質天成溫文日就受冊之初宐盡輔導之方而乃以鹵莽如臣者猥廁遴選之列則豈不舛乎及正廟昇遐純廟嗣位貞純聖母臨朝宣召上荐下別諭始除戶曹佐郎辛酉拜持平東

朝又下別諭敦勉先生疏陳師門事竟得伸復時召命累降又除掌令繼下別諭史官相守閱月四上章辭且乞召還史官批旨愈篤壬戌因筵臣奏請宣召自是臺銜敦諭殆無虛歲或再三至連章辭甲子因仁政殿災宣召至諭以來不來卜治不治旋陞軍資監止遣玉堂問繼講冊子又辭乙丑貞純王后禮陟詢因山月數進退辭不獻議上疏陳慰丁卯間繼講冊子以讀書次第之著於近思錄者仰對又命薦林下宿德之士辭不對壬申拜進善以聖候康復元良定位而未克造朝

上疏待罪 批旨舉心齋赴 召用禮時事諭以先  
正之後贊成至親先君以息前人是似又疏辭尾陳  
朱子封事中輔儲一條以仰勉及冊禮成諸 殿宮  
咸有表裏之 賜先生辭職兼辭賞典冬因大臣延  
白陞通政階 下別諭屢百言尋拜工曹叅議上疏  
辭癸酉拜成均館祭酒乙亥陞嘉善拜贊善又拜工  
曹叅判再上章辭丙子 惠慶宮薨上疏陳慰再拜  
大司憲并疏仍謝追 恩丁丑 世子入學後陞嘉  
義拜大司憲移承政院左承旨還大司憲有周恤之  
命仍下別諭上疏辭且言虛糜官銜久損朝體亦恐

殿下教胄將不免疎略己卯行 世子冠禮 別諭  
敦召禮成有錫馬之 恩嘉禮後又錫鹿皮連疏兼  
辭賞典辛巳 孝懿王后昇遐上疏陳慰 遣春坊  
官詢 因山前 春宮開講當否對以經權酌量之  
宐又問 山陵合祔時將事所服先生對以王朝典  
禮未有經文可據者不得不叅用士禮癸未以李文  
成公系后事 命收議先生附奏畧曰先正臣宗事  
因故相臣金壽興往復商確於臣先祖文正公臣時  
烈建白于 朝成命特下倫紀大定者已百有餘年  
今此李希祖之疏乃以宗統墮壞神理幽枉爲言直



歸之於非禮不正且以臣祖之書爲有所激而不得其正讀之未終駭汗浹背臣不敢妄有開喙文蹟俱在公議未泯惟在上裁旣又往復士友確守先論事遂得已丁亥翼宗代聽及元孫誕降上書陳賀仍勉睿學曰邸下睿資天成令聞夙彰而未滿弱冠之年遽膺代勞之命責任之重宜若不能無動心者而克念克敬夙夜匪懈政事施措罔或有違羣情洽然愛戴深切必須益懋睿學益進睿德所知所行各臻其極然後可以躋治於唐虞有光于祖宗仍請取朱子奏劄進講書筵己丑令逐朔優

送米肉後拜都憲上書辭兼辭米肉冬拜世孫師上書辭庚寅問大報壇祭享祝上旬日不用初字當否附奏略曰不用初字是大統曆之例則今欲釐正者實關於尊周大義也世子薨上問服制先生辭以今此邦禮係是先祖臣得禍之案心神驚錯尤何以措舌仰對仍上疏陳慰前後辭本不書僞號而疏到喉院承旨姜浚欽諉以違格還下治章更進又不書僞號舉顛末引義批曰咎在喉院何必深引王世孫用禮別諭敦召以未赴命上疏待罪辛卯拜吏曹叅判以王世孫開講又命敦召

上疏辭兼謝 恩賜鹿皮冬因大臣筵白 命以其  
子差送近邑守令甲午 純廟昇遐今 上嗣位間  
成服時冠禮當否以儀曹所陳疑禮問解之說當爲  
今日可據爲對仍上疏陳慰領敦寧趙萬永疏請  
大行大王世室先生承問而附奏略曰 大行大王  
至仁盛德度越百王今於世室之議孰敢有聞然哉  
復土後上章陳慰仍勉 聖學畧曰 殿下方在冲  
弱之齡遠膺艱大之投目今急務莫先於保護 聖  
躬將就 聖學而苟欲保護而將就未有切於進講  
小學服食起居之節修齊治平之道是所以充完血

氣涵養德性皆不可舍是而他求且是書所引夫孰  
非切要而若九容九息敬勝怠義勝欲等諸條尤是  
服膺而不可須臾忘者也仍陳敬禮大臣親近正士  
以盡薰陶資質之方冬因相臣筵白陞資憲拜刑曹  
判書戊戌以優老典例陞正憲二月十日考終于正  
寢距其生己卯爲八十歲病勢危篤精爽不愆門人  
有所問難酬答如響以禔躬修行申戒子孫且云累  
世文字有志未就先師行狀罔及卒業是爲遺憾訃  
聞撤朝市別致賻 傳曰宋祭酒以林下宿德久被  
先朝禮遇而予小子嗣服尚未遂招延之誠方切歉

惟今聞逝音不勝傷盡令該曹及本道庀喪又命  
吊祭士友咸與相弔曰斯文喪矣門人環經者百餘  
人太學生操文奠酌閏四月二十一日葬于沃川寧  
國寺左麓戊坐後因筵臣言不待狀而謚用道德博  
聞一德不懈二法 賜謚文簡先生恩津人胄于高  
麗判院事諱大原九庵先生文正公卽先生六代祖  
也五代祖諱基泰同中樞生諱殷錫縣監 贈吏曹  
叅判叅判公子諱會源 贈吏曹叅議孫諱礪相  
贈吏曹叅判會孫諱煥明 贈吏曹判書兩世俱承  
家趾美判書公娶平山申氏思德女端一靜淑配德

無違舉先生于永嘉之九潭先生大身脩準肌膚玉  
雪而雙眸炯然器度凝重溫潤精純天資近道而孺  
染家庭早自向學及就師門與聞大道之要其學以  
讀書窮理爲先反躬實踐爲本而敬爲其要由小學  
近思以及四書又以心經聖學輯要爲羽翼諸子外  
家皆不屑也晨謁家廟退坐書室齊莊斂膝專精翫  
理始則寧淺無深寧畧無詳而終致心融神會雖在  
邵齡取太極西銘庸學等書晨夕念誦以朱宋兩夫  
子大全爲畢生家計未嘗釋手終日匡坐肩背竦直  
身不設散容口不出俚諺兢兢乎如對神明遠非禮

於視聽加戒懼於幽獨本原澄澈大本自立至其養  
滋積厚年彌高而德彌邵周旋動靜自中規矧謙恭  
祥吉謹於色辭充中而發外者粹然也居恒簡默而  
對人款洽無賢不肖莫不誠服常以藐孤爲至痛事  
叅判公盡誠志物養備叅判公忘老而無子申夫人  
早年晝哭先生承順左右務適其志凡爲家政必稟  
而後行嘗欲周人窮乏而請于夫人夫人空杼軸聽  
其所施子母各得其義者如此嘗如外氏所聞親癘  
疾歸山路昏黑有虎前導向曙而止咸謂孝感攸致  
季氏過房早歿無嗣弟婦煢煢無依先生每接屋而

居經始家事立嗣子俾不殄祀尤謹於追遠籩豆魚  
菽盡其蠲潔耄及而猶致如在之誠存撫宗族無親  
疎之別每戒後進曰祖先修德自貽敦睦敢不以祖  
先之心爲心乎又曰吾宋之稱大族非以科宦以先  
世行治也若不砥礪名行頽損家聲則雖科宦輩出  
失吾家本色闔庭斬斬有序恤卑幼御臧獲各得其  
宜其所以正倫篤恩者可謂兩至矣尤嚴於出處大  
節自筮仕至上卿除命相續 恩諭荐疊及伸師冤  
朝家欲必致乃已而揆分度義終始牢辭曰當今之  
世雖有孟子力量有難施措非直以不嫺世務自分

迂疎也以故抗章丐免未嘗攬及時事惟拳拳於  
聖學成就潛靖自修以不見成德有足以勵世警俗  
何必進爲而後爲報哉指引髦士亦出苦衷而不許  
執贄曰斯禮也有名而無實去其名而存其實可也  
且云好名固學者之弊而今世則亦難見好名之士  
信能好名則亦稍知檢押可矯頽俗也經生學子因  
材施教雅言士不可局小不能恢拓田地則不可以  
大受此朱子所以思見大心衆生也柔惡不如剛惡  
剛惡者覺悟則或有所勇斷而柔惡者雖自知非因  
循吝改終於下流皆衰世意也病世之學者未嘗求

真知實踐而全事口耳自湖洛之論歧貳彼此互爭  
甚則撐膺弩眼僂若仇敵故未曾容易說與有問者  
輒云此非初學所急苟實心體認行當自得然其正  
見透徹一下打破其論理氣則曰理者氣之主宰氣  
者理之所乘原氣之所以生則雖固有理而論理之  
所方立則亦必在氣有先後而實無先後有離合而  
實無離合一而二二而一也論人物性則主理同氣  
異曰氣質非直人物不同人人各不同物物亦各不  
同本然非徒人人皆同物亦與人無異此所以一本  
而萬殊萬殊而一本也論心體則曰心氣也者對性

之稱氣之精爽不囿氣質方寸中理亦善氣亦善於  
此下惡字不得若云本心有惡則所謂復初者只復  
其惡而已焉用學爲苟以明德謂有分數則孟子何  
以曰人皆可以爲堯舜乎嘗有詩云稟得氣時理亦  
兼何嘗天意別洪纖須看通局分明訓彼固無虧此  
不添又云愚誠在氣耳惡豈根心哉賦與同人物偏  
全異塞開是可見名理之正豈世儒僱耳傭目者倣  
及哉立論務主和平而善利之判如一刀兩段嘗謂  
玄石之爲世道害甚於尼尹光佐之兇浮於四凶每  
念國勢孤危民生顛連殷憂永歎繞壁不寐忠愛一

念炳然如丹不知其身之在草野也家貧屢空而處  
之晏如嚴於辭受苟非其義一芥不取及受養專城  
仰戴俯怵若不自勝勉胤子以至誠圖報焉答人經  
禮之間必尋思推求極其指要其周詳慎密惟恐自  
誤而誤人雅不屑辭章絕不作閒言語有零藁藏于  
家配貞夫人金氏其考亮和沙溪先生後孫也幽閑  
淑哲孝敬備摯莅饋四十年閱盡艱巖而賓祭靡所  
闕先生固窮守約用底醇德得於內助者爲多系子  
欽成前郡守三女適金裕淵金基馨權中建郡守男  
後洙復洙女金炳禹趙炳翼金厚均長婿男萬秀福

秀次婿女李源一嗚呼吾東之學至栗谷沙溪尤菴  
三先生而始闢荒闢陋明體適用如文王治岐周公  
制禮爲斯文之宗嫡先生胚胎前光克纘厥緒妙齡  
求道得其所依歸本之以忠信行之以誠篤翫樂而  
至於融深存養而至於淵密渾然博約之會功與志  
滿卽先生所準擬而天假大耋克遂其願卓然爲  
三朝之賓師一國之元老豈非貞德之符自然而然  
者哉蓋其爲學規度恪守三先生成法平易明白親  
切端的門路真正遵家學而濬洛建傳百世而無弊  
於乎休哉直弼嘗涉荆江逢先生于路次幾如孟萬

年故事而瞻望不及後拜于荃村見其和順所積英  
華晬盎端拱危坐儼若泥塑有百原整襟氣象是可  
驗得之深養之厚道明而德立迄今半百載而猶覺  
餘薰襲人也胤子以直弼有契於觀感要一言掩諸  
幽直弼晚生謏識癘病垂死曷敢妄擬其範圍乎若  
論其造詣所極則自有後世堯夫直弼何敢述焉略  
掇其悅服者而敘之繼之以銘銘曰

允文文正我東考亭爲百世師集羣儒成道莫與大  
功莫與京直字真訣垂裕家庭德厚流光鍾毓先生  
芝蘭其姿金玉其精惟孝惟友源本百行先立其大

明信主誠夙志勇往祖述憲章寤寐思服江漢羹墻  
矻矻孳孳後禮先經肫肫翼翼左準右繩真積力久  
永觀厥成秉心之公鑑空衡平見理之真龜卜燭明  
日章錦褰天聞鶴聲丹鳳銜 詔白雲鎖扃囂囂真  
樂坦坦幽貞詎欲己甚身世兩忘量時量已畢生自  
臧確乎介石素履彌剛不易不成功用白彰囊封獻  
忠葵藿傾陽衛道伸師世教與榮斯文之望重於岱  
衡之綱之紀髦士是型白賁無咎視履考祥令聞達  
尊永世耿光沃州之山若斧其瑩鬱鬱拱木赫赫英  
靈我銘厥最通昭千齡

慶州府尹朴公墓誌銘 并序 ○辛亥

錦石朴忠獻公有孫諱錡壽孝悌恬潔無愧爲法家  
拂士惜乎其發跡蔭塗不得大究厥用而惟以治行  
第一著稱識者多以爲非所以處公者噫今公墓草  
已屢宿而嗣子齊寬以公太碩人命屬不佞以玄隧  
之文嗚呼韓文公於馬少監銘歎其久不死而觀人  
三世者殆同余感矣公字美京潘南氏以麗季純臣  
文正公諱尚衷爲上祖屢傳至治川文康公諱紹爲  
世名儒高祖 贈吏曹判書諱弼履曾祖公州判官  
贈左贊成諱師錫砥行厲操不輝于躬至我近齋先



生暨錦石忠獻公諱準源兄弟一以道學爲時宗師  
一以勳勞爲國蓋臣始大而昌公之考 贈吏曹參  
判諱宗翊以錦石公第三子早卒無育而公以伯父  
戶曹判書諱宗輔第三子爲之子判書公配達城徐  
氏郡守廣修其考也太碩人杞溪俞氏彥字之女市  
南文忠公其先祖也忍死植孤慈嚴兩盡卒底于成  
而養志無憾以宦迹則戊寅推 恩拜 永禧殿參  
奉歷掌樂漢城主簿辛巳出監南平縣值歲大饑殫  
力賑濟爲道伯隣牧所稱獎癸未換令新溪縣先誨  
後罰子撫蚩蠶移守信川郡多異政有杜召之頌戊

子移成興判官介嶺下以煩劇稱處之裕如爲上下  
所倚重庚寅移瑞興府使處孔路使价芻午酬接無  
滯民有息肩之誦壬辰移華城判官值歲大飢賙賑  
有濟乙未差宣惠廳郎筦庫緝頑措處有方大服貢  
市人心至今不怠丁酉出爲羅州牧使以親病乞遞  
壬寅以 特旨復授華城時 憲廟展省 園陵供  
億措辦咸推謂非君莫可丙午遷奉 綏陵以勞勩  
滋多陞通政資授敦寧府都正丁未推 恩以 綏  
嬪嬪京之後甲授同副承旨尋除刑曹叅議旋拜慶  
州府尹以疾不赴嗚呼此公踐歷本末而有不足以

槩公實行者也 憲宗戊申二月二日患風痰而卒  
去其生戊午五月六日爲五十一歲三月廿七日葬  
于楊根龍津里坐酉之原始公罹毒熾術師言叅判  
公墓地不利勸公別占壽藏公曰生死已有定命詎  
可歸咎先墓吾身後縱占名穴不若附葬親塋神理  
人情之所愜也竟卜兆密邇咸稱公孝感攸致云配  
貞夫人東萊鄭氏吏曹叅議觀綏其考也舉一男三  
女男齊寬女適金炳儒餘幼公幼而就養所後有潑  
愛于太碩人動靜云爲恐拂親志居常兢兢如執玉  
奉盈莅信川聞太碩人病間道疾馳數百里山路徒

步昏黑行迷有虎當前導公行及渡碧瀾津風浪作  
船幾覆公顏色不少變風恬浪靜得以利涉可見公  
至誠定力有以孚物而感神也冲齡就學于李公秉  
源李公爲近齋執友清高有立而於太碩人爲內舅  
教誨純篤以故公日用常行罔不有典則軌範居恒  
好書手不釋卷叅判公願學近齋有純誠近齋許以  
父子間知己而厄於短造罔克其志業近齋齋恨終  
身公嘗以生不及近齋爲恨然以公偉器粹質若不  
早藉門蔭徊徨出入於米盞簿書之間由家學門路  
進取擴充則其所造就詎止於斯耶公會置亭東湖

爲晚暮投老之圖而風流雲散江湖有餘韻矣銘曰  
士哉若人清修自持家學紹述我實期之浮遊蔭塗  
吏懷民思推孝爲政謠俗熙熙歸歟晚計堂構墜茨  
流水不競停雲俱遲造余談故間以獻款乃忽長逝  
使我心悲鑿石掩幽未忍終辭肖胤克家垂裕在茲  
茲爲不朽庸俟千期

文山李公墓誌銘 并序

自吾哭汝弘經數寒暑而汝弘之德容名論未嘗不  
恍然接乎耳目日汝弘胤子鍾和鍾文訪吾寂寞之  
濱曰知先人者莫丈人若願以一言責諸幽曰吾何

足以爲不朽圖雖然吾平生守愚世莫取者獨子之  
先公愛好篤至至糊聯往復竿牘不遺隻字子期死  
吾之聲不發久矣今爲之銘其必有犁然契者矣公  
諱載毅號文山汝弘其字也系出璿派 厚陵別子  
德泉君謚積德公諱厚生爲始祖至諱斌諱之綱父  
子俱中司馬兩場及文科官郡守世傳清白并 贈  
都承旨承旨公生諱瑒通經術好氣節甲子丁卯國  
難以白衣扈從亂定而逃隱薦授官不就 贈戶曹  
叅判生諱尙敬統制使與李貞翼公浣齊名陪 孝  
廟入瀋陽質館卽公七代祖也曾祖諱柱國刑曹判

書累典元戎諡武肅 正廟托以心膂祖曰涵 贈  
左承旨考曰應五進士 贈戶曹叅判妣曰安東金  
氏承旨若行之女也以 英宗壬辰十二月三十日  
舉公于外氏第仍受業外翁文藝夙就未弱冠已發  
監試雙解 純廟辛酉對經義中生員己亥三月九  
日卒于尚洞里正寢五月葬于陽智長丞洞乙坐從  
先兆也 贈嘉善大夫戶曹叅判兼銜如例以子貴  
也公娶驪興閔氏叅奉志赫女文忠公鼎重文孝公  
鎮長其先祖也生五男五女男鍾英武承旨先公而  
歿鍾和中軍鍾黃及兆興俱歿鍾文其季也女長通

府使申從洛次徐正淳次趙存一宣傳官次韓永錫  
進士次鄭延壽鍾英取鍾和男一演爲嗣公生稟秀  
美孝友天植武肅公鍾愛殊絕常不離左右武肅公  
志氣骯髒耻以韎韝屈於人設家塾招賢士以教子  
孫公蚤從柳鼎模南有斗學二人者咸以文學名公  
固有所傳習及長問禮于近齋朴先生束脩性潭宋  
文敬公之門兩賢期許綦重居恒專精研經晚益喜  
易默契心得好爲詩遇境陶寫不事塗澤余每勉其  
誦出公笑曰猶勝閒說話易觸忌諱也有遺集藏于  
家公性度寬和器局宏厚中心坦易不設畦畛養生

送死塚飾家奠克殫誠力視諸弟以一體視其子女  
以已出兩弟歿於任所撫恤諸孤用底成立事姊如  
母候問無間日推及宗族姻戚無親疎厚薄喜施與  
周窮乏每竭力而後已或被見欺待之如舊且恥言  
人過失以故賢愚貴賤咸服其德德於儉不厭非惡  
到老無改淡泊世緣而於山水有濃情每懷辰孤往  
搜盡域中羣勝所至觴詠跌宕風流溢發常歎留債  
於長白瀛洲蓋嗜欲淺故天機深安時處順與物無  
競蕭然有凌霞之舉焉雅重友道與不佞五十年情  
契莫逆晚景窮轍止泊窮湖則公每乘輿相携臨風

把酒相對忘形不知孰爲主而孰爲賓公今不在而  
江湖有餘恨矣不佞嘗讀論語主忠信而曰歷選斯  
世可當此三字者惟汝弘存耳程子所云內積忠信  
所以進德者公其庶幾乎遂爲之銘曰

世趨靡靡沒身聲利有意近名是亦爲僞吁嗟乎公  
腳踏實地閤然潛修常知有已嗚矣善人爲國之紀  
非直宗黨咸稱孝悌孝悌爲政一家康濟由由不失  
守我天君詎若世儒羊質虎文文山峨峨文水汙汙  
荷衣蕙帶超然不羣縱軀委命晦養是遵胡不憇遺  
永闕九原報在不食垂裕後昆靡我狀德疇識其真

鑄銘玄隧昭無垠

禮曹判書肅獻閔公墓誌銘 并序

近故大宗伯肅獻閔公捐館後二十八年嗣子侍郎致文將琢辭載實用納玄隧問銘于直弼直弼後生也靡敢以姓名累公幽宅累辭而不獲乃忘僭而爲之敘公諱命赫字明汝鼻祖曰稱道尚衣奉御歷高麗八 本朝珪組奕世名德輩出不須譜也至諱著重號訥齋與弟老峯文忠公諱鼎重屯村文貞公諱維重并顯爲國蓋臣官大司憲 贈左贊成是爲公高祖也曾祖諱鎮周吏曹判書 贈領議政貞簡公

祖諱應洙號梧軒右議政文憲公兩世俱有清德雅望文憲公以義理未伸屏居驪江并世名賢咸稱其不可及考諱百昌承旨 贈吏曹判書用公貴也妣豐山洪氏蔭叅判重疇女公本生父 贈吏曹叅判諱百憲以貞簡公從子判官諱興洙之子出爲右議政文孝公諱鎮長季子 贈吏曹叅議諱德洙之子叅判公娶全州李氏顯之女以 英宗癸酉十月二十三日舉公庚戌中司馬乙卯擢庭試丙科 正廟稱其風度綽有典型將究大用被翰圜自嫌衰晚不赴召試以攝記注陞典籍辟兵曹正郎憫扈輦隊無

料輒僱丁議定料布以重陪衛在彼大僚請譴事則  
永遵識者躋之入臺垣自正言至持平獻納掌令執  
義司諫轉司僕正南學教授文兼宣傳官直講司成  
弘文錄自副校理至應教應教 特除也公疏陳孤  
露失學不堪備顧問因 嚴命黽勉就職而於講筵  
及試役則輒辭 純廟初服亦陳自畫之義請以誠  
實無偽四字藉手於今日是可見素志也已未虜主  
之喪抗章言禮不貳斬請改彼中服制之失以典祀  
官屢承 賞賜盖公於祀典克致蠲潔爲 上所稱  
焉庚申按廉于海西原濕靡監夙夜殫竭民隱邑瘼

關防沿革多所整釐墨倖之因論啓被拿者不敢請  
一言行查世稱得直指體道伯鄭日煥方倚勢嚇甚  
而示意殷勤公據義不應壬寅以 王妃冊封奏請  
書狀官赴燕清嚴自持一行不敢犯禁復 命加通  
政階拜同副承旨序陞至左拜大司諫兵曹叅知叅  
議叅議刑曹者屢而聽斷明確尤倦倦於名教風化  
都民肅然甲子出幸安東樹風振紀關節不通異趣  
者亦頌其政入爲禮吏兩曹叅議己巳出牧揚州楊  
處畿輔管轄衆瘼滋興公承弊易變因登對條陳多  
有施行焉冬以 翼廟胎封都差使員勞陞嘉善移

拜大司諫歷漢城左右尹兵曹叅判同知經筵義禁  
府副摠管江原監司未赴提舉活人署冰庫壬申  
孝懿大妃六旬稱慶公以年甲同進階嘉義癸酉冬  
以大妃周甲陳賀禮房承旨又陞資憲拜禮曹判  
書都摠管知經筵春秋義禁因事罷敘議政府左右  
叅贊工刑兩曹判書差籌司堂上又提舉奉常寺戊  
寅七月十八日卒于泥洞第正寢享年六十六訃聞  
命輟朝賜祭致賻九月葬于忠州山尺面梅村乾坐  
賜謚肅獻公孝友天植四歲而孤十二歲而過房卽  
罹內艱執喪如成人伯氏正郎公不起疾公患疹未

脫危而躬操殯斂承事世母立嫂及撫養兩姪女者  
恩愛純篤靡極不至攝祀享管田宅積勞誠勤閨庭  
靖簡人無間言尤殫心於宗嗣奔走飲泣未暮年而  
舉長胤宗祧有托人謂公至誠攸感李夫人素患風  
痺公夙夜于側親執秤水以至割指進血及居憂毀  
瘠幾不全凡係附身附棺以至三年饋奠靡不措辦  
終事無憾焉於本宗兄弟極因心之友或有至難言  
處亦無幾微色事伯氏叅判公盡誠叅判公名位踰  
躋公常恐資歷之或先一切進取澹若相忘畢生遵  
晦殆欲自靖焉訓子姪甚嚴教導成就各盡其道性



善施與不計疎賤緩急吉凶竭力周恤至困倉俱傾  
然後乃已嘗見暴骸在塗解衣而瘞之每見人凌寒  
徒涉輒停行修橋行路咸頌其仁心及物類此忠愛  
根天革布時抱疏犯蹕 正廟屢加褒詔及釋褐世  
道朝象泮渙潰裂而公則不撓不激挺然特立以府  
尹公遺訓聽天所爲勿任小智爲世守之符焉時有  
權倖昏夜委訪攬掇不已公終始牢拒亦不造謝雅  
言吾無寸長惟不以禍福易心如有關 宗社存亡  
而人皆怵迫逡巡者當不惜一死以報 國恩但恐  
見識未逮耳素自樹立亦可見於此矣晚見憂虞轉

甚而論議益睽或繞壁而隕涕焉公氣質寬厚而壹  
遵繩墨操履端方而必準理義踐述先法不求知於  
人而砥礪有素言行潛孚出處行休自有一副成規  
立朝二紀侃侃自持要不忌納君於無過受知 健  
陵而遽罹 弓劍之痛庚辛間備經佗僚積被齟齬  
尤致意於進退消長之幾終始見忤晚雖致位崇顯  
而益復迤蹇公安時處順靡所尤悔杜門養疴影響  
俱息是故知公者鮮矣公自少師事止菴止菴期望  
綦重嘗云物我無間有成已成物之仁惟閔某庶幾  
無愧亦嘗就霽軒沈公學又與族兄觀生窩彝顯中

李直輔以道義相講磨博涉經禮諸賢咸  
許公以敦篤有守內蘊不泄族兄文穆公鍾顯每稱  
公可以托六尺而寄百里君子以爲知言配青松沈  
氏郡守載鎮之女青平尉益顯其高祖也端秀聰敏  
夙習女誡諸書旁通史傳承尊章以孝處妯娌以和  
事君子教子女俱盡其分叔父霽軒公稱以女士生  
與公同年卒先公八年始窆楊根遷附公墓左舉二  
男五女男長致殷監察出后正郎公次致文卽謁銘  
者也謹拙儉約克趾先美爲士友所推重女適李龍  
沼直長宋明熙金魯玉進士金護淵參判沈宜臣庶

女適學官李寅岳長房男世鎬德鎬教官女參奉金  
佑鉉承旨李埈進士李寅稷次房男慎鎬參奉慶鎬  
進士女郡守李益在李載信李鳳在承旨朴齊憲庶  
子惇鎬慎鎬男泳稷進士泳穆泳季慶鎬男泳和李  
龍沼女金愚喜宋命熙女金益章進士李綺夏金魯  
玉男進士豐喜頤喜女尹進鉉檢閱李承益金護淵  
男觀秀女李容準參奉沈宐臣男英澤餘并幼歷選  
後世以標望自高者舉歸於都雅端詳穩算可否者  
類而然遇少利害僅如毫髮其不爲首鼠轉駒者幾  
希若公者夷險一節無所緇磷卽所云以忠信爲本

先立其大者也孝悌孚于家庭誠慤著于朝廷事不  
避難言不顧嫌致身則知所急讓愛君則恐有關失  
慨然發憤多在公正而不少沽術儒林碩德之讓與  
質行者詎不信哉擔夯重望實著如公而不盡其用  
者亦可見守身之大是可以爲銘銘曰

驪興壯胄文忠貞憲醇德名節爲世表準有美肖孫  
克修克踐尊厥所聞干櫓禮義施於爲政罔敢失墜  
確確其守矯矯自礪鬱鬱晚翠大耐寒歲巖巖墻壁  
寧加藻繪凡厥養望舉多循外疇若我公專修其內  
翼翼匪懈譽譽匪躬原公始終惟孝與忠誰云無本

師教是崇所崇維何曰止庵翁并潔不食養而不窮  
垂裕後昆弗祿永隆梅鄉之嵌有封其隆虔薦石章  
昭揭幽宮

清修金公墓誌銘

并序

嗚呼此清修先生金公之墓也公嘗位于朝不稱其  
位而稱其號者以晚節矢願之在茲也公諱宗善字  
城甫清風之金胄于高麗侍中大猷八 本朝有諱  
湜大司成文毅公倡明道學爲己卯名賢五傳至諱  
堉領議政文貞公生諱佑明清風府院君忠翼公忠  
翼有三子諱萬胄 贈吏曹判書諱錫翼漢城左尹

諱錫衍工曹判書貞僖公貞僖長子安城郡守 贈  
左贊成諱道濟爲判書公後第三子進士 贈左贊  
成諱道泳爲左尹公後是生判敦寧孝靖公諱聖應  
孝靖長子清原府院君靖翼公諱時默又爲郡守公  
子 贈頌議政聖集後是爲公祖考考諱基大工曹  
參議 贈吏曹參判妣曰延安李氏其考長源也配  
曰 贈貞夫人德水李氏弘模之女文忠公端夏五  
世孫也生先公 缺 歲卒先公十一歲附公墓左生一  
女及笄而殤繼配貞夫人恩津宋氏應鼎之女生一  
男益哲郡守郡守無嗣嗣子元植今順安縣令公有

庶女適縣監李陶淵公以 英宗丙戌十月七日生  
庚戌 正宗親享 太廟第十室 教曰 聖后本  
家嫡長宜有一命况清風嗣孫又爲清原奉祀事不  
偶爾適值今日收用之舉非私也事理卽然 特除  
敦寧府參奉辛亥遭承重祖妣喪甲寅除 光陵參  
奉轉濟用監奉事尚瑞院直長陞掌樂院主簿移平  
市署主簿及令戊午相臣奏云某居家好書爲官飭  
已吏事無所礙請先除守令己未拜宜寧縣監庚申  
貞純聖后臨朝 特除公右副承旨俾任保護 聖  
躬累拜至左承旨間拜刑曹戶曹參議敦寧府都正

丙寅拜寧邊府使戊辰還銀臺己巳翼廟誕降以  
陳賀承旨陞嘉善階累拜同義禁漢城左右尹副摠  
管同敦寧刑曹叅判提舉掌苑署庚午十一月二十  
四日考終于安國坊第正寢享年四十五計聞上  
震悼下恩綸深致其恫惜嗣子待年長錄用贈賻  
有加遣官賜卹辛未正月窆于清修洞別業之後  
麓命勿拘部界許葬後遷于楊州道峯山下又遷  
于春川安保驛村忠翼公兆次此爲公始終大畧也  
公自幼朗慧纔學語已辨事理當否鬢齷就學于李  
公述源李公性高簡眼空一世而獨許公甚重數年

中已通羣經專心爲學兼研三禮聰悟絕人經眼輒  
記歷代史乘儒先遺書國朝掌故往往如誦已言終  
身不怠居恒杜門對床不知書外有事晚好尚書自  
謂樂而忘味云於本朝諸儒最慕退溪李先生文集  
言行錄常不去案口有若無實若虛犯而不校惟退  
翁可以當之及出宰嶺邑委謁陶山書院低回久之  
不忍去卽以氣味相近也性於孝蚤失怙恃畢生舍  
恤晨起謁廟非甚病不廢事祖母盡誠常不離左右  
言笑怡愉務適其志居憂一遵禮經三年不入中門  
塚飾家奠務盡節則而常以儉戚爲本焉事姊如母

視甥姪如子教育家塾推及宗族賓友正倫篤恩靡  
極不至焉居家不以事物經心亦不問家人產業而  
處官盡職視吏民以家人痾瘼一體如救頭目及歸  
不以一芥自累以故兩邑黎獻久益愛慕公家再結  
天姻世篤忠貞而公憂愛根天常眷顧 宗國往往  
涕泣不自勝每以承宣登 講筵援据經史反復敷  
陳皆是天德王道尤拳拳於主敬立本發之以韶音  
令辭傷觀莫不贊歎以 上淵默而亦有喜色或  
命讀書而聳聽焉持躬謹畏出入禁闥數十年不言  
溫室樹如古人之爲未曾役心於服食雖在廐晚自

奉如寒士公天分極高明粹英睿神清氣和德符於  
行與人坦易不設關楗無賢愚貴賤罔不悅服異趣  
者亦謂當時真士夫惟有公一人耳公專於內養喜  
愠不形物我無間然自有尺度凡權衡人物精切不  
差秉心公平好惡愛憎靡所處而不得其正以故當  
面規箴靡所假借而人不致憾焉晚益好學居安資  
淡嘗歎爲仕宦攸奪罔克專精研理然博極羣書而  
折諸聖人純篤羣行而不愧往哲口無擇言身無擇  
行夷考表裏無不可對人言者渾然赤子之心純乎  
天理之正孟子所云大人公其庶幾乎不佞與公夙

托伍聲之好清標雅操格言至論森羅耳目可存而不可刪然欲悉書則失之於煩故抵舉其大者而其他因亦可見也不佞始志學請益公答云除却閒思慮省却雜文字遵朱子半日靜坐半日讀書取論語俯讀仰息日從事於忠信篤敬之方真爲神丹妙劑是見公爲學節度也不佞癘病垂死竟未聞道每念公惠訓自不禁撫卷太息也公常事近齋寧齋兩賢又友潁西任公老洲吳公諸公不拘形蹟而樂與之往復近齋嘗贊公曰資質粹美生長烜赫而無綺紈習氣相臣何不請用以文學而乃以吏事也深以所

用非所養爲歎公與李文簡公始源托歲寒之契李公胤子鳳秀子岡哭公而悲馳書不佞曰虛襟坦懷好學博識倫理之篤厚志操之清高非斯世所可得君子以爲知言公有遐情遠韻常慕周邵翫心之學願結屋溪山主靜養真而形格勢禁鬱鬱不得志晚始問舍于清修洞中興至孤往野服藜杖超搖於巖居川觀或累日忘返飄然有遺世獨立意公少號松齋又號居仁晚稱清修公每携不佞于茲區臨風把酒揚挖名理要與分華用娛晚景未及攀蓮軸而公遽歿矣精靈奕奕在洞天雲壑而弘長之風流不可

復見矣於戲悲夫銘曰  
顯顯令德文毅文貞倡道行善永世儀刑迄于公躬  
克紹家聲積久暉吉天畀斯羸生稟純粹庶隣顏程  
冰壺秋月徹底其清金玉之章斐然其成求仁爲己  
踏實忘名焯焯衆美本之研經何必釋褐正笏揚廷  
屢甄納約乃見真誠苟使得志萬物咸寧絃歌孚應  
如影隨形割鷄一臠焉測泰釧泥塗軒冕何有貳卿  
寤寐肥遯永矢沙衡未賦遂初遽靳遐齡大化冥漠  
不昧聲靈維壽春山宰如其瑩發潛闡幽納銘玄扁  
靡敢諛辭玷累公明永世不朽清修先生

贈禮曹叅判韓公墓誌銘 并序

上之十一年辛未土賊洪景來等起西陲陷據定州  
城州人前 恭陵令韓公浩運罵賊不屈死事聞  
特贈嘉善大夫禮曹叅判兼同知經筵春秋館義禁  
府事五衛都摠府副摠管 旌其閭曰忠臣之門翌  
年 命設壇于州東隄川之上歲以破賊日祭公及  
同時立懂諸人伐石用紀厥事 宣其祠額曰表節  
又 命官公之子季麟 朝家褒嘉之典備矣公字  
文翼其先清州人高麗太師蘭是爲鼻祖有諱興輔  
雄泰順彬及嘉興金鼎滿卽公會祖祖禰及外祖也



公世家定州不甚顯至公而奮父病泣禱北辰割指以進血始仕負祿米供母及爲 寢官當朝夕供輒泣曰吾有老母未忍下咽輒賣其半用替甘毳純孝之出天植者率如此以帖括擢庚申第歷學諭典籍陵令秉銓者聞其名要欲一致將擬臺閣公笑而不應曰欲見我者謂其賢耶懷刺而得美官是以利招而以利進俱失於義吾不忍爲也以故終身不調及西警棘憂憤不欲生謁時相請往諭賊降之巡撫營津遣盤纏公不受遂杖劍徒步而往直詣城外曰若輩出聽吾言賊問誰也曰我韓某也爲活汝滿城生

靈而來賊引公入景來使其徒勸公還公大聲曰吾欲曉景來景來問來欲何爲公曰吾欲諭汝降景來曰有何官守而忘死乃爾公曰汝亦 王化中物汝不早降天其勦滅汝彼脅從者將由汝無噍類顧語諸賊曰若輩蚩蚩不辨逆順吾哀矜若輩指示生途信能斬渠魁出降其罔汝罪景來曰君非韓孝子耶速上堂吾將饋之食意欲誘公公叱曰吾豈從逆賊食景來喝令跪公挺立如植賊徒崔亮根縱公足血淋漓以注公終不動大罵如初景來曰彼孝子也不可殺屬其徒禹君則撥官軍虛實公又叱曰吾豈爲

狗鼠輩泄王師機密乎君則竟不能奪遂遇害公臨  
命猶抗聲不輟卽壬申三月十二日距其生辛巳爲  
五十二歲也賊簣公屍投城下公之子孟麟負屍而  
歸孟麟爲復讎從軍城破剗完根肝醫之是年九月  
啓藁殯顏色凜凜如生穿五老峯下夫人墓右乾坐  
而葬焉夫人陽川許氏壘女舉二男孟麟季麟孟歿  
而有二子季今爲東部令有一子并幼公好學慕古  
旅夜常篝燈讀書見往哲格言懿行必激昂感發疾  
書揭壁用當座右銘襍被置夏楚時自撻以警屋漏  
愧嘗聞鰲村宋公穉圭之風卽屣屣走懷川時值大

多冰雪嵯峨公竟行束脩禮歸而演繹師教罔晝夜  
矻矻在職得覲由卽出都門或問其太遽曰旣辭不  
卽發是欺君也其事事求是者如此嗚呼 國家昇  
平累百年民不知兵潢池小醜一朝闖發未旬日而  
半省失守望風奔潰或降且走當時事誠凜然寒心  
矣公靡有官守之責君父之命眞所謂不識何狀而  
出萬死不顧一生赴難如樂地殺其身靡悔斯可以  
愧王臣苟活之心而折亂逆方生之氣不半歲而賊  
就殄滅卽公一死之功有以致之也昔賢所云罵賊  
之舌強於百萬精兵者詎不信哉傳曰求忠臣必於

孝子之門公實有焉公嘗從余遊氣義相感余亦期  
公以鮮于遯庵黃執庵之流托歲寒之契比余在嶺  
中聞西亂謂公必死蓋以其素性凌烈常恐不得其  
死公竟得其所而死果不負所望豈不誠與榮乎哉  
季麟克紹先誼時來問字又謁墓銘余非不朽人者  
然知公深而服公真者恐莫余若也非余銘公而誰  
爲者遂爲之銘曰

烈烈韓公萬夫之特釋褐守躬彌介于石象裘我絺  
夷然自得茲其素日讀書之力殉國家急素所蓄積  
奮不顧身以義諭賊談笑刃鋸指叱鼎鑊蝨爾鼻撓

難以化革抗聲不絕死則明白志士成仁一何卓卓  
俾我箕邦永樹人極應有英靈化爲霹靂一方妖祲  
不日清廓孝卽天經忠爲人則維斯二者公實無忤  
赤腳烏頭貴若故宅五峯巖巖遺廟血衄衿紳駢趨  
牲醴無射卽墓于傍四尺若屋琢辭螭頭我無愧色  
歷千萬億其永無泐

大司諫李公墓誌銘 并序

正宗大王聖智天縱道兼君師以作成人材爲致治  
之先務維時大司諫李公登高科膺妙選贊皇猷而  
賁文教於乎休哉公諱翼晉字穉明幼而聰敏性於

孝友十歲遭外艱居憂如成人服闋以童蒙隨教官  
八侍 英廟問他日立朝何以事君公對曰當以事  
親之道事之 上嘉其純實稍長博綜經史爲詞章  
敏妙驚人癸巳中司馬公於功令諸體尤工四六屢  
魁泮試故事入格者例誦被選程文 正廟特命公  
免誦庚子魁柑製 命製進謝箋公隨步成章筵臣  
聳觀後伯氏大諫公入對 教曰爾弟不廢時文乎  
放榜後當入文臣之選勿以己第而筮蹄也壬寅赴  
庭試殿試隸槐院癸卯被選講製文臣每課試 上  
指公券曰眞館閣手也以畫最 命陞六品除兵曹

佐郎後拜叅知叅議禮曹正郎司諫院正言至大司  
諫司憲府持平掌令弘文館副修撰修撰副校理校  
理知製教宗簿寺正禁衛營從事官湖南京試官屢  
拜承旨至左戶曹刑曹叅議曹司五衛將伊川南陽  
谷山春川安邊府使是爲內外踐歷也甲辰朝叅以  
正言條陳十二事幾盡蒙 允在玉堂疏陳六事勉  
聖學貽燕謨用人材恤民生明義理正風俗又言刑  
書遵用 大明律而又有續大典爰 教輯錄故擬  
律無冤用法得中然無一統衷輯之書則難於叅考  
請依續大典例類輯刊布此大典通編之所由作也

乙巳掌試湖南及辭 朝獎諭諄復公承 命感勵  
一心恢公士望翕然丙午以年四旬 命除文臣講  
製每石渠校書輒膺 命叅校丁未以 綏嬪嘉禮  
都廳敎勞陞通政拜承宣夏出守伊川時值屢歉往  
往有萑苻之警始出於畿甸號爲清溪賊按捕者捉  
峽氓穿窬者認以清溪黨誇張其功以冀顯賞公會  
查春川得其情實所全活甚衆八路鄉校例有學廩  
以養齋儒而伊獨無焉公移牒方伯得依他州府畫  
下邑有定齋朴文烈公書院院規草創公區畫土田  
以屬之王子以承旨在院嶺儒李堦等萬餘人治疏

將上以無太學回通見阻禁門要自喚院捧入公曰  
儒疏之無太學謹悉者不得入徹例也喚院豈可乖  
例許八少頃疏已到院公守前議却之其黨羣起侵  
斥公陳章引退 命罷職不叙叙拜刑兵佐貳移銀  
臺時繳還 傳教以不請中官謂慢君命并下諸承  
旨王府公謫昌城月餘蒙 宥公射藝甚精及在謫  
上燕射後苑 教曰因微旨不見吾射伴久矣未幾  
賜環癸丑莅南陽因前倅失治吏民不相得 命極  
擇其代銓部以公膺 命及辭 教曰多年近密夙  
知所存本邑復同大寒之餘必息陽春之政公視事

數月衆務畢舉府與水原接壤營建城闕策應甚繁  
公措處有方事不擾而集值歲歉抄戶賑饑民無殿  
屎秩滿西叙丁巳正月以承旨將隨 駕華城虎符  
發廣州兵公以發符時做錯 命配畿沿定以安山  
以高陽改書下仍 命留接杏州村舍居數日 宥  
還旋敘爲春秋校正也戊午九月有手圈羣書校正  
之役與諸閣臣及新舊抄啓文臣輪直鑄字所以校  
正事殷特遞承旨用專其任十一月 駕幸宣禧宮  
駐輦 命公率祇迎人入侍宮內 書下御製詩命  
祇迎人賡進仍 命以所下御製御筆爲公傳家之

物先是伯氏出守淮陽板輿就養是年臘月承濟候  
晝夜兼程而已無及以罔克終孝爲沒身至慟時公  
已垂衰而猶居喪盡禮衰服不去體饋奠不替行三  
年如一日方公之急向淮陽 上憫其嚴程冒寒遣  
閣吏 賜毛衣 教筵臣曰李某雖在草土校書非  
所拘每令籤論以進庚申 仙馭賓天公痛冤號擗  
如不欲生辛酉伯氏有西塞之行旣宥還公復隨班  
聯爲承旨時 純廟頻御講筵公敷陳精切朴忠獻  
公準源在禁直聽公所奏贊歎以真講官云冬出守  
谷山御史李勉求書啓褒美丁卯秩滿還朝已巳秋

又守春川吏有挾勢圖囑者公不爲之撓吏欲逞憾  
潛偷殿牌公究覈得情獄旣成道伯以文案有差啓  
聞請勘擬律奪告身 特命分揀辛未內移左承旨  
累拜旋遞癸酉拜大司諫六月除安邊府使值甲戌  
大歉殫心調賑不煩上司按使請褒時 智陵告願  
命本府從優修葺公竭力經紀斂不及民而功亦就  
及歸御史鄭基善褒啓善政自是除 命屢降而或  
拜或不拜已卯 王世子行冠禮陳賀時公年衰示  
憊而猶力疾參班子弟難之公曰吾受恩罔極雖至  
顛仆義不當偃處私室連日赴 闕公退而添筮四

月一日壬戌考終于俊秀坊第去其生丁卯爲七十  
三五月辛酉葬于忠州金生面無愁里丙坐公系出  
璿源 成宗別子茂山君諱悰其始祖也生扶安君  
諱碩壽 二陵之變與牛溪成文簡公審視松山尸  
軀詳陳其誣遂定以弓劔改封生完城君諱秀英生  
順平君諱善鳳是生漢城判官諱必輔始完城公值  
昏朝金墉之變與順平君獻議守經順平夫人嚴氏  
丁丑之亂與判官夫人具氏殉節 旌閭判官公有  
子諱時蕃宣教郎寔公高祖也曾祖諱邦稷祖諱昌  
文考諱命復進士文行爲士友所推重妣金海許氏

僉樞垣之女已卯名臣 贈判書伯琦其先祖也公  
天資溫粹風度閒雅言語步趨精詳端重蚤罹靡怙  
之哀舍恤終身養偏親順志無違事伯氏愛敬俱至  
五十年不析箸而庭無間言勵志勸業文學夙就而  
不以詞藝自多尤慎樞機口不道朝廷得失持躬謹  
約不喜交遊門墻蕭然如幽人逸士跡罕及權門雖  
不見親好而亦不見忤當世道變易怵迫者或趨西  
東而猶不能免公恬靜自守動止如常而亦不及焉  
位列下大夫者三紀右階多後生少年而處之恬然  
莅官廉潔常俸外一無所私五典州郡室如懸磬家

無僮指厩無僕馬晚益斂退訓誨諸子恒以君恩之  
不敢忘交道之必可慎諄諄戒飭子孫皆好學守約  
斯可見公身教之所推也有晚香齋稿若干卷藏于  
家配延日鄭氏處士梅之女松江文清公後孫也生  
後公一年沒先公八年養尊姑孝享先祀誠事夫子  
順處妯娌和周恤窮乏若不及略通經史哲處物之  
義故公每謂立朝行已得於內助爲多夫人喪在殯  
值關西潢池之警京師震駭士大夫遭故者皆渴葬  
公詔諸子曰國有難仕宦家當喪遑汲則民心益危  
懼矣吾今老且死雖未能出一言定人心寧可爲推



波助瀾之歸乎壹遵經禮無或效人始窆于富平先  
兆移附公墓左舉五男長正殷進士次正魯中生進  
兩試次正豐皆先卒次正洪次正完側室女二長適  
朴永鉉次適梁鍾述正殷生一男二女男肅冕女適  
韓應聞白珩洙今郡守正魯生二男一女男泰冕華  
冕進士女適權惠仁正豐無男取華冕爲後女適孟  
欽爽正洪生一男一女男需冕女適俞進源正完生  
四女長適洪一貞次適朴秉周餘幼朴永鉉有四女  
梁鍾述有一子內外曾玄不錄公自在韋布受知  
聖主及釋褐而眷注彌隆侍帷幄垂二十年裨右文

之治鳴國家之盛譬如天降時雨大化流行草木待  
之以甲坼鳶魚於是乎飛躍其盛矣乎公季胤及諸  
孫謁不佞以玄堂之文不佞癯殘瀕死未聞命者久  
矣常恐風燭奄及不克副其苦誠力疾爲之銘曰  
允矣季公早策令名垂紳揚庭受知 聖明石渠虎  
觀問難羣經黼黻煌煌瓊佩琤琤丹穴之羽應律和  
聲南山之毛遇霧成章五邑絃歌組述循良本之則  
存孝弟爲仁施於有政庶幾化醇位不稱德致詰秉  
勺水清山肅中州之原有恤斧封從以哲媛齊芳合  
德死穀偕臧厚積遺贏垂裕流光銘以貞之用詔無



